

# PENGHIIROEDAW



Taon V, 15 Nov. 1929, No. 58

## KANG LAM YAN...?

atawa

SI BOEROENG WALET DARI  
KANG - LAM

Oleh:

ONG HAP DJIN

Terbit saben boelan tanggal 15  
Mesehi dengen tetep.

PENERBIT:  
TAN'S DRUKKERY  
SOERABAJA

## ISINJA :

I	Sedikit penoetoeran . . . . .	1
II	Tiga hoeroef jang menggemparkan . . . . .	13
III	Satoe permintahan jang sanget . . . . .	26
IV	Tanda bekas telapakan kaki . . . . .	38
V	Tjara bekerdja detective djempol . . . . .	48
VI	Pikiran jang sanget roewet . . . . .	55
VII	Satoe antjeman . . . . .	64

enz. enz. enz.



*Detective*

# Kang Lam Yan.

Sebab ini tjerita detective ada sedikit pandjang dan sekarang blon dimoewat tamat, maka „Pemandengan“ kita toenda sampe laen nomer.

Dalem sementara waktoe ini, selagi pembatja ising-isng membatja ini boekoe detective jang blon tamat, ada baiknja djika soeka poesingken kepala sedikit boeat tjoba membade: „Siapa pentjoerinja itoe barang-permata“ jang oleh Wat Song lagi dioesoet.

Tjerita detective jang bagoes dan berisi nasehat bisa menambaken pengataoean jang bergenena dan bikin pembatjanja djadi lebi tjerdik !

---

# KANG LAM YAN (?)....

atawa

SI BOEROENG WALET DARI  
KANG-LAM.

Oleh: ONG HAP DJIN.

---

## I.

### SEDIKIT PENOETOERAN.

**W**at Song ada sala satoe akoe poenja sobat kekal jang paling baek. Ia itoe ada satoe pamoeda jang salaennja berpikiran tadjem dan bertabeat tertip poen sanget radjin jakinin roepa-roepa peladjaran, teroetama ilmoe detective. Maka ia soeda djadi sanget katarik sama pengetahoean prihal ilmoe detective, jalah sebab ia ada banjak membatja boekoe-boekoe tjerita Europa teroetama jang menoetoerken perdjalannja Scherlock Holmes. Soenggoe akoe ada sanget kagoemken ia poenja kapandean membade orang poenja resia hati, dan lantaran itoe djoega, kabanjakan sobat-sobatkoe jang laen seringkali soeka ganggoe padanja dengen madoeken roepa-roepa pertanjahan jang soeker dan soelit. Kaloe Wat Song briken djawabanna, maski tjoema dipikir dengen sakedjapan sadja, toeh ada banjak dijtoe, teges dan terang. Betoel diantara begitoe banjak soewal jang ia

telah petjaken, ada djoega jang koerang tjotjok, tapi toch moesti diakoech djoega, bahoewa diantara sepoeloe soewal jang dipetjaken olehnya, ada toedjoe jang djitoe ; hingga tida oesa diboeat heran jang sobat-sobatkoe itoe telah pandeng ia sebagai satoe detective jang pande.

Pada brapa taon jang laloe, lantaran mengobati saorang sakit akoe telah ditoedoe melakoeken perboeatan-perboeatan jang melanggar wet, hingga perkaranja diseraken ka dalem tangan politie. Tjoba tatkala itoe Wat Song tida bekerdja keras goena akoe, jaitoe lakoeken penjelidikan dengen tertip dan radjin hingga perkara mendjadi terang, pastilah akoe bakal terdjiret oleh tali oendang-oendang negri zonder merasa berdosa. Lantaran menginget jang ini ada boea jang paling pertama dari ia poenja pakerdjahian selakoe detective, maka Wat Song laloe toelis satoe boekoe peringgetan tentang itoe kedjadian dengen kalimat „Sinar lampoe dan bajangan orang”.

Sedari itoe waktoe sobat-sobatkoe jang laen kaliatan djadi lebi kagoemin dan djoega lebi indaken lagi atas Wat Song poenja kapandean dan datjerdikan; samentara gelaran Scherlock Holmes dari Timoer orang laloe briken padanya. Ini ada sebagai satoe tanda, jang ia poenja nama moelai djadi terkenal diantara publiek.

Akoe dan bebrapa kawankoe jang laen ada merasa, bahoewa gelaran jang orang briken pada Wat Song itoe ada katinggian, tapi toch

heran sekali, jang Wat Song maski dengen adem telah trima gelaran terseboet. Sala satoe diantara sobat-sobatkoe ada jang tertawaken dan djengekin ia berhoeboeng dengen didapet-kennja itoe gelaran. Sabaliknja dari goesar atawa maloe hati, Wat Song telah djawab djengekan itoe dengen bangga : „Peladjaran, pendapetan, pengetahoean dan laen-laen sebaginja jang modern, ampir semoeanja dateng dari djoeroesan koelon—Europa—Sedeng bangsa kita adalah jang madjoe kablakangan djaoe. Ilmoe detective adalah sala satoe diantara itoe pengetahoean modern dan jang akoe sendiri paling gemar jakinken. Sherlock Holmes memang ada sanget pande dan oeloeng dalem itoe pakerdjahan. Kaloe ia dibandingken sama akoe, boleh dibilang ada saoepama barang dari satoe kwaliteit jang oekoeran dan timbangannja sadja jang katjek, jaitoe ia poenja oekoeran ada lebi besar dan ia poenja timbangan ada lebi berat.. Sekarang orang soeda briken akoe itoe gelaran jang kaoe pandeng ada sanget katinggian ; akoe boleh tida oesa merasa ketjiwa, malahan sabaliknja dari itoe, akoe anggep ada sebagi scherm dari akoe poenja kabodoan. Dan apa djeleknja kaloe akoe soeda samboet itoe dengen tangan terboeka ?“

Mendenger ini djawaban jang djiroe dan tjengli, itoe sobat jang menanja telah menjadi boengkem dengen moeka mera lantaran maloe; salandjoetnja terhadep sama Wat Song ia tida

brani mendjoewal laga lagi.

Kerna pakerdjahian detective salaennja dilakoeken dengen otak jang entjer dan sehat djoega perloe dengen tenaga dan pengetahoean obat, maka Wat Song ada goenaken banjak temponja boeat beladjar ilmoe silat dan pahamken ilmoe obat-obatan, kerna ia poenja kaniatan boeat djadi satoe detective ada begitoe poenja besar dan soenggoe-soenggoe hati.

Pada Bin-kok taon kalima, Wat Song bersama koelawarganja telah pinda di kota Gouwboen dan ada tinggal mendjadi satoe dengen akoe. Kota terseboet salaennja soenji djoega hawanja ada njaman, hingga tjotjok betoel boeat di tinggalin oleh soeatoe orang jang lagi pahamken peladjaran.

Tiap-tiap sore, sasoedanja bersantap, kerekali kitaorang (akoe dan ia) sembari mengisep pipa tembako, doedoek beroending di kebonan. Fatsal apa jang kitaorang bitjaraken tida bisa tentoe, satoe tempo omongken tentang penghidoepan, menoetoer tentang perdjalanan dan terkadang membitjaraken hal-hal gaib jang berhoeboeng dengen katachajoelan. Tida djarang lantaran meresepnja kitaorang beroending sampe tida inget lagi jang sang hari soeda djadi malem. Sedeng djika kitaorang membitjaraken fatsal pakerdjahian detective, boleh dikata senantiasa akoe ada difihak jang kadesek dalem itoe pembitjarahan.

„Akoe rasa,“ begitoe satoe kali akoe perna

moelai bitjaraken itoe hal „tjoema telapakan tangan dan kaki sadja, jang satoe detective haroes perhatiken, selagi ia permoelahan menjelidiki sasoeatoe perkara jang ada berhoeboeng dengen pembongkar, perampokan dan laen-laen sabaginja.“

„Kaloe begitoe,“ djawabnja Wat Song sembari tersenjoem simpoel „kaoe ini soeda kena dipengaroein oleh boekoe-boekoe tjerita Europa, Pauw Long. Kaoe haroes pikir, bahoewa roema-roema jang di Europa orang tinggalin, sabagian besar ada terbikin dari dinding papan jang ditjat hingga mengkilap. Lantaran itoe, soeda tentoe sekali segala telapakan gampang dипreksa; tapi ternjata tida begitoe dengen bangsa kita, apapoela sepatoe jang bangsa kita pake, kabanjakan ada terbikin dari barang jang lembek, hingga tanda telapakannya bisa dirobara-roba djadi besar atawa lebi ketjil, menoeroet orang poenja soeka. Soenggoe ada beda djaoe sekali dengen sepatoe jang biasa dipake oleh orang-orang Europa, jang terbikin dari koelit jang kakoe hingga besar dan ketjilnya tanda telapakan kaki senantiasa pas betoel dengen oekoeran sepatoenja. Samentara tanda telapakan tangan, maski di kantoor - kantoor politie ada disimpen copy dari telapakan tangannja orang-orang berdosa besar, soepaia gampang dikenalin bila oelangken poela perboeatannja; tapi toch pendjahat-pendjahat jang tjerdik ternjata tida maoe kala mengadoe taktiknja sama politie.

Iaorang bisa klaboein mata politie dengen djalan, selagi melakoeken kadjahatannja, memake kous tangan atawa laen-laennja. Djika si pendjahat ada goenaken itoe matjem taktik, apatah kita boleh pertjaja sama itoe tanda telapakan tangan ? Detective - detective bangsa Europa sendiri tida telaloe pertjaia itoe tanda telapakan tangan dan kaki, lebi lagi detective - detective bangsa kita. Lebi djaoe, sabagimana kaoe soeda taoe, akoe ini boekan ada detective jang beker-dja dienst pada negri, salaennja itoe djoega akoe merasa tida perloe moesti beroeroesan sama segala pantjalongok atawa pentjoeri-pentjoeri ajem enz., perloe apa akoe moesti mengandel sama itoe tanda-tanda ?"

„Apabila begitoe, abis kaoe nanti bisa lakoe-ken penjelidikan dengen djalan jang bagimana?“

„Dengan tida ambil perhatian sama itoe tanda-tanda, tentoe sekali akoe ada goenaken laen tjara“.

„Tindakan bagimana kaoe aken ambil dan tjoba bilanglah ?“

„Tentoe sekali akoe tida bisa kasi kaoe kapastian, sebab lebi doeloe akoe moesti liat dan taoe doedoeknja perkara, baroelah akoe pikir-ken, tindakan bagimana akoe boleh dan koedoe ambil“.

„Moestail sekali ! Sasoéatoe detective moesti ada mempoenjai satoe kapastian tentang tjara-tjaranja, bagimana kaloe maoe lakoeken penjelidikan, kerna tjara-tjara itoe ada saoepama

sendjata pada masa perloe."

Wat Song tida maoe mendjawab lebih djaoe lagi, hanja sembari tertawa laloe poeter bitjara ka laen djoeroesan.

Kerna akoe memang mengakoe kala djaoe sekali, baekpoen dalem hal kepandean maoepoen pemandangannja, maka djoega maski akoe tida merasa poeas dengen itoe djawabandjawaban jang ia briken, toch akoe moesti toendoekken kepala. Seringkali dalem hatikoe timboel niatan-niatan boeat tjoba ia poenja kapandean.

Pada soeatoe hari, atas adjakannja sala satoe sobat, akoe telah melantjong di sepandjang soenget dengen mendajoeng praoe. Doea djam lamanja, jaitoe satelah merasa tjape sakoedjoer badan, baroelah akoe berdjalan poelang. Sedari ketjil, boleh dibilang baroe ini kali sadja akoe plesir mendajoeng praoe, maka djoega tjaranja mendajoeng ada sanget rantjoe dan ada goenaken tenaga loear biasa. \*Itoe sebab djoega pakeankoe telah menjadi lepek basa ampir saänteronja.

Koetika sampe di roema, boeroe-boeroe akoe ganti pakean dan sepatoe serta sisirin ramboetkoe jang teraoet-aoet kena serangannja angin jang santer.

Baroe sadja akoe selese beresin pakean dan ramboet, koenjoeng-koenjoeng Wat Song telah bertindak masoek. Disaät itoe djoega dalem hatikoe telah timboel pikiran ingin tjoba padanja, kerna

tadi waktoe akoe melantjong di soengei tida ada satoe diantara sobat atawa kenalankoe jang dapet taoe katjoewali akoe sendiri.

„Wat Song,” akoe laloe moelai berkata „tjoba kaoe boleh tebak, jang berselang belon lama, akoe soeda bikin pergerakan apa?”

Ia brenti menindak dan matanja laloe memandeng padakoe dari kapala sampe di oedjoeng sepatoe. Akoe awasi ia sembari tersenjoem menjindir, kerna akoe pikir, ini kali ia bakal katjele atawa tebakannja tentoe aken meleset sanget djaoe. Akoe merasa pasti sekali aken kedjadian begitoe roepa, kerna salaen akoe tida biasa plesir di soengei djoega keadahan dirikoe ada serba beres.

„Oh, Pauw Long,” ia berkata dengen soeara tetep dan sembari tersenjoem „boekankah kaoe ini baroesan plesir di soengei serta mendajoeng praoe?”

.....Akoe djadi tertjenggang boekan maen dan letletken lida lantaran dapet kanjatahan, akoe sendiri jang katjele. Sakoetika lamanja akoe tinggal boengkem sembari berdiri dengen tida abis mengarti, mengapa ia bisa tebak dengen begitoe djitoe.

„Baek,” kata akoe kamoedian „kaoe soeda bisa bade dengen djitoe, tapi lagi sekali akoe ingin menanja: Di soengei jang mana satoe, akoe soeda maen itoe praoe?”

„Di soengei Hong Thian Tong!” ia menjawab „kombali betoel atawa sala?”

„Heraan !“ treak akoe sambil gojang kapala „Apa brangkali kaoe soeda dapet kabar lebi doeloe atawa soeda mengintip dari kadjaoehan waktoe akoe mendajoeng praoe di itoe soengei ?“

Dengan kalakoean sabar Wat Song tarik satoe krosi boeat doedoek.

„Dapet kabar lebi doeloe djoega tida,“ Wat Song mendjawab „mengintip dari kadjaoehan poen tida. Akoe soeda tebak dan djitoe, itoe ada menoeroet akoe poenja pendapetan dan doegahan.“

„Dan,“ kombali akoe menanja lebi djaoe „dengen ilmoe apa kaoe soeda mendoega ; tjobalah tjeritaken ?“

Sembari tersenjoem dan manggoet-manggoet-ken kapalanja ia telah mengoetaraken penda-petannja begini : „Akoe poenja tjara mendoega ada saderhana sekali. Dengerlah baek-baek : Betoel kaoe poenja pakean ada rapi sekali, tapi kaoe poenja badan ada kaliatan begitoe lela, sedeng kaoe poenja kraag leher kaliatan lepek dengan kringat, maka djoega dengan saklebatan sadja akoe lantes bisa taoe, jang kaoe tentoe baroesan abis maen sport dengan goenaken banjak tenaga. Sport lari, voetbal atawa lompat? Inilah tida bisa djadi, kerna itoe boekan ada sport jang kaoe gemarin, maka akoe poen tida maoe mendoega ka itoe djoeroesan. Biasanya kaoe ada sanget gemar maen silat; apa brangkali baroesan kaoe train itoe permaenan ? Ini

djoega tida bisa djadi, sebab biasanja kaloe kaoe lagi apalken itoe ilmoe, tentoe memake badjoe tipis jang kaoe sengadja sediaken boeat itoe kaperloean. Tapi itoe kringat sekarang akoe liat ada mengoempol di kraag, maka djoega akoe pertjaja jang kaoe tentoe tida abisan train silat. Kamoedian koetika akoe liat kaoe poenja kous kaki jang seperti berteroetoean bekas ketjipratan aer, dengen mendadak akoe djadi inget, bahoewa selang doe minggoe, toean Khouw telah adjakin kaoe plesir mendajoeng praoe. Tatkala itoe kaoe soeda menampik lantaran terhalang dari banjaknja kerdjahan jang moesti dibikin rampoeng. Ini hari sebab ada banjak sempet kaoe telah penoeken adjakannja toean Khouw jang soeda lama itoe. Inilah ada sebabnya akoe mendoega seperti tadi akoe soeda seboetken."

— „Inilah soenggoe ada oendjoek kaoe poenja katjerdikan, katertipan dan kapandean, sobatkoe, maka djoega akoe soeda djadi toendoek dengen kaoe. Tjobalah kaoe tjeritaken djoega, dengen berdasar atas alesan apa, maka kaoe soeda tebak jang akoe telah plesir mendajoeng di soengei Hong-thian-tong ?”

— „Maka akoe soeda mendoega jang kaoe tentoe baroesen plesir mendajoeng di sana, jalih dengen meliat kaoe poenja ramboet jang begitoe rapi, jang roepanja seperti baroesan disisir bahna teraoet-aoet kena serangannja angin jang santer. Ramboet jang banjak dipakein pomade hingga

djadi sanget kakoe dan litjin seperti kaoe poenja, tentoelah kaloe boekan angin jang kliwat santer, tida nanti sanggoep bikin aoet-aoetan. Dengan menilik keadahannja hawa oedara sekarang ini, salaennja di deket-deket tepi laoetan, pasti tida ada angin santer. Itoe sebab, mengapa akoe lantes membade jang kaoe tentoe soeda plesir mendajoeng ka sana."

— „Soenggoe sobatkoe, kaloe menilik kaoe poenja kapandean dan katertipan dalem hal melakoeken pakerdahan, itoe gelaran Sherlock Holmes dari Timoer jang orang banjak briken pada kaoe, benar-bener tida ketjiwa. Tapi sobatkoe, tjoba seandenja tadi, waktoe akoe abisan plesir mendajoeng laloe ganti djoega ini kous kaki, kaoe kira tentoe kaoe tida bakal bisa menebak dengen begitoe poenja djitoe ?”

— „Boleh djadi ; tapi mengapa tadi kaoe tida bersedia atawa pikir sampe disitoe ?.....”

— „Itoelah ada oendjoek akoe poenja tjerobo dan koerang sabar.”

— „Djoestroe lantaran kaoe poenja koerang sabar dan gegaba hingga akoe bisa mendoega dengen sanget tjotjok.”

— „Tapi saoepamanja tadi akoe ganti kous kaki dan kraag leher hingga dandanankoe ada begitoe rapi, kaoe aken goenaken tjara jang bagimana ?”

— „Ha ! ha !! ha !!! Sobatkoe Pauw Long, sasoenggoenja oetjapan begitoe tida haroes di-oetjapken oleh saorang sebagai kaoe, kerna

bisa bikin ketjiwanja nama Watson dari Timoer. Kaoe haroes inget sobatkoe, bahoewa barang tiroean tida nanti bisa dibikin rapi zonder ada tanda atawa tjatjatnja. Sasoeatoe detective selaloe moesti tangkep itoe tanda atawa tjatjat boeat mengoesoet sampe didasarnja perkara."

Lantaran ia poenja penjaoetan jang lantjar, teges dan djitoe itoe, akoe telah djadi boengkem, kerna kapoetaesan perkataan boeat membanta lebi djaoe. Akoe djadi lebi mengindaken poela padanja.

Menoelis sampe di sini, akoe dapet perasahan jang bisa djadi djoega pembatja merasa djemoe, kerna akoe soeda melantoor terlaloe djaoe ka djoeroesan jang tida ada berhoeboeng dengan maksoednja kalimat dari ini boekoe tjerita. Akoe soeda sengadja toelis sedikit penoetoeran di atas ini, akoe poenja maksoed tida laen tjoema sakedar boeat oendjoekken pada pembatja, tentang bagimana tertibnja Wat Song dalem hal mengoesoet perkara-perkara ketjil.

Nah, pembatja, marilah kita moelai dengan maksoed dan toedjoeannja kalimat terseboet di atas.

---

## II.

## TIGA HOEROEF JANG MENGGEMPERKEN.

Pada soeatoe hari Wat [Song telah adjakin akoe pergi djalan-djalan di atas tembok benteng boeat iseng-iseng bikin pemandangan. Tentoe sekali lantaran benteng itoe terpisa tida seberapa djaoe dari roemah kita orang, sedeng tatkala itoe kebetoelan akoe dalem kasempetan, maka doega dengen senang hati akoe trima baek adjakan terseboet dan sigra djoega kita orang brangkat bersama-sama.

Di itoe tempat kita orang rasaken badan amat seger lantaran dapet kasioernja angin sedjoek. Memandeng ka satoe djoeroesan bawa, kita orang dapet nampak sawa-sawa jang baroe abis ditanemin padi jang bergenjang-gojang sanget pelahan tida beda saoepama kaen soetra idjo lebar jang digelar. Beberapa anak-anak doesoen dan orang-orang tani, jang roepanja merasa lela lantaran abisan bekerdja berat, kaliatan pada mengaso rebaken dirinja di goeboek-goeboek jang terletak di antera sawa-sawa terseboet. Maski tjape dan lela, iaorang tinggal dalem kagoembirahan, jaitoe pada bersenang-senang menjanji lagoe desa koeno, jang dipendengeran ada amat merdoe.

„Boleh dikata baroe liwat brapa hari sadja kita orang tida dateng pasiar ka ini tempat,” Wat Song berkata sembari tersenjoem dan

tangannja menoendjoek ka itoe djoeroesan „moesin semi telah mendoeloein kita poenja koendjoengan di'ini hari.”

„Djoestroe itoe moesin,” akoe bilang „jang soeda tarik kita orang ini hari dateng ka mari.”

Kita orang laloe naek ka tingkatan tembok jang lebi tinggi, dimana kita orang liat peman-dengan alam di sapoeternja itoe benteng jang seperti lagi toendoek di bawa kita orang poenja bawa sepatoe. Dari itoe tingkatan 'ang tinggi, kaloe kita orang menengok ka timoer, lantes dapet liat bebrapa boea praoe jang berlajar bersaliweran di soengei Tong-houw, sedeng djika kita orang berpaling ka barat dapet nampak goenoeng - goenoeng Leng-giam, Thian-peng enz. jang diselimoeti oleh awan poeti bergeneloeng-goeloeng, hingga sa-klebatan seperti prempoean tjantik 'ang lagi mengintip dari keree dengen kasi liat separo moekanja sadja. Itoe semoea pemandangan telah menambaken kita orang poenja kagoembirahan.

Samentara dari b-gian sebelia depan dari itoe atas benteng, ada tertampak satoe atawa doeae boea meriam koeno jang soeda antjoer, diantara batoe bata dari roeboehan tembok benteng jang soeda meroepaken poeing.

Berlaloe dari sitoe dan baroe sadja djalan antara bebrapa tindak, kita orang dapet liat poela roeboeban tembok benteng, dimana roeboehan itoe telah dikoempoel dan ditoem-poek-toempoek djadi satoe goendoekan ketjil.

Beberapa anak ketjil kaliatan lagi memaen di sitoe dengen sanget goembira, sambil sabentar naek dan sabentar poela toeroen.

Meliat ini keadahan, akoe djadi inget tentang keangkerannja benteng terseboet tatkala negri kita masi dalem kangkangan bangsa Boan. Itoe wakoe benteng ini ampir saben taon ada dibetoelin, soepaia bisa djadi lebi keker dan koeat, sedeng pendjagahannja poen ada dilakoeken sanget tertip dan keras, saolah-olah ini benteng ada sanget penting bagi perlindoengan itoe pamerenta jang teramat tjoan-tji. Tentoelah bangsa Boan atawa kaoem pamerenta di'itoe wakoe sekali-kali tida mendoega, bila kamoedian ini benteng bakal dapet nasib saroepa dengen kardjahan Tjeng.

„Hola, Pauw Long !.....” sakoenjoeng-koe-njoeng Wat Song berseroeh dengen soeara kaget tertjampoer heran „Tjoba kaoe liat, barang apatah itoe ?”

Lebi djaoe ia laloe menoendjoek dengen djarinja ka satoe djoeroesan, hingga telah kedja akoe djadi toeroet merasa heran. Akoe laloe mengawasi ka'itoe tempat jang ia toendjoek, dimana akoe dapet liat saboetir ketjil benda jang bergenirlap didjoedjoe sorotnja sinar matahari. Wat Song telah mendoeloein akoe poengoet itoe barang, jang ternjata ada saboetir moetiara.

Bermoela akoe merasa sangsi kaloe benda itoe ada moetiara, hanja akoe kira tentoe ada

barang maenannja sala satoe diantara itoe anak-anak ketjil, jang boleh djadi soeda djato dengen tida dapet diketahoei oleh jang poenja milik.

Sabaliknja dari mendoega seperti jang akoe pikir, Wat Song telah tetepken anggepannja, bahoewa benda jang ia poengoet itoe betoel ada saboetir moetiara jang salaen mahal harganja djoega ada barang jang langka.

„Sobatkoe, tjobalah kaoe boleh preksa jang teliti,“ ia laloe sodorken itoe benda pada akoe dan berkata lebi djaoe: „akoe pertjaja jang kaoe nanti bakal tetepken kabenerannja doegahankoe. Akoe rasa kaloe tjoema dengen oewang satoe atawa doeа ratoes dollar sadja, tida nanti bisa dapetken barang jang bagini poenja bagoes“.

Akoe samboetin dan preksa itoe moetiara jang ternjata ada toelen. Boekan sadja besarnja ada sedikit loear biasa, tapi djoega ada sanget bening hingga bisa mangeloearken tjahaia gilang-goemilang seperti saboetir brilliant jang mahal harganja.

„Dan“, akoe laloe menanja seraja kasi kombali itoe moetiara „apatah kaoe bisa doega, siapa jang poenja ini milik ?“

„Kaloe diliat di bagian tenganja ada tanda sedikit lobang,“ Wat Song menjaoet „seperti bekas dipake sebagai leontine atawa laen-laen maenan, perhiasan orang prempoean. Biar bagimana djoega, prempoean jang tida mampoeh tida nanti bisa mempoenjai ini matjem barang. Akoe rasa ini ada miliknja saorang prempoean

anaknya ambtenaar negri jang berpangkat tinggi, atawa satida-tidanja tentoe anak hartawan besar. Tapi di sini boekan ada tempatnya prempoean pasiar, maka djoega menoeroet akoe poenja pendapatan, boleh djadi jang ini barang telah ditimpa oleh pentjoeri dan kamoedian soeda djato di ini tempat zonder dirasa."

— „Boleh djadi doegahanmoe ada tjotjok. Dan....apa brangkali moetiara itoe ada kapoenjahannja Giam Wan-gwe atawa Poei Wan-gwe, sebab selang kira-kira saboelan lamanja, boekankah iaorang poenja roema telah kabongkaran?"

— „Akoe sendiri poen ada rasa begitoe. Akoe denger kabar, bahoewa kadoea familie Giam dan Poei itoe, soeda kabongkaran dalem satoe maleman sadja. Apa ini kabar ada bener?"

— „Betoel itoe kadjadian perkara bongkar ada berbareng dalem satoe maleman. Kaloe itoe ada dilakoeken oleh pendjahat, pastilah pendjahatnya boekan sembarang bangsat. Itoe waktoe soerat-soerat kabar ada moeat verslagnja pandjang lebar, hingga publiek mendjadi gemper. Apa kaoe masih inget semoea?"

— „Masatah sama itoe kadjadian jang boleh dikata masih baroe sekali, begitoe gampang akoe djadi loepa? Jang djadi pembongkarnja itoe doeae roema hartawan, kabarnja ada si Boeroeng Walet dari Kang-lam. (Kang Lam Yan)!"

Sampe di sini penoelis merasa perloe menoeterken sedikit riwajatnya itoe pendjahat jang terkenal dengan gelaran : Si Boeroeng Walet

dari Kang-lam.

Giam dan Poei doe-a-doeanja ada terkenal paling hartawan di kota Gouw-boen. Pendjahat jang bongkar iaorang poenja roema telah bisa gondol barang-barang permata dari masing-masing poenja gedong, berharga kira-kira sapoeloe riboe dollar. Si pendjahat lebi doeloe menggeratak dalem roemanja Poei Wan-gwe, kamoedian baroelah bebena di roemanja Giam Wan-gwe. Di tembokan dinding dari itoe kadoea gedong si pentjoeri ada tinggalken tanda peringatan masing-masing tiga hoeroef: „Kang Lam Yan”. Lantaran hoeroef itoe ada bagoes, maka orang banjak laloe mendoega, bahoewa si pendjahat tentoe ada pande djoega menoelis.

Menoeroet katanja sala satoe boedjang dari Giam Wan-gwe, katanja si pendjahat ada sanget sebat tjaranja djalanken ia poenja praktijk. Lebi djaoe boedjang terseboet ada kata, lantaran mendenger soeara bekresek di dalem roema, ia laloe bangoen dan djalan berindap-indap boeat memreksa. Di dalem gedongnya Giam Wan-gwe tatkala itoe ada sanget gelap, kerna boleh djadi semoea penerangan telah di pademin oleh si pendjahat. Dalem keadahan jang begitoe gelap ia telah dapet liat dengen samar, satoe bajangan item berklebat kaloebar dari dalem kamarnja Wan-gwe dengen sanget tjepelet, tida beda saoepama boeroeng jang lagi terbang menjamber korban. Oleh kerna terkedjoet, si boedjang laloe bertreak sakoeat-koeatnja, tapi

baroe sadja ia bisa oetjapken satoe atawa doe a kali treakan, ia rasaken moeloetnja kena ditimpoeck dengen barang keras, maka sakoetika itoe djoega ia telah mendjadi pangsan.

Sigra djoega orang-orang sadalem roema mendjadi gelagapan bangoen serta soeloet-soeloetin pelita, sedeng si pentjoeri soeda lama berlaloe. Marika laloe sedarin si boedjang jang masih pangsan, jang dari moeloetnja kaliatan mengoetjoer banjak dara. Menoeroet papreksahan, ia poenja gigi doe a bidji telah tjoplok lantaran ditimpoeck dengen satoe petjahan genteng tana, jang besarnya tida lebi dari 2 c.M. pasegi.

Maski djoega hartawan terseboet merasa politie tida ada harepan nanti bisa bekoek si pendjahat, tapi toch iaorang soeda mengadoe djoega, lantaran barang-barang permata jang ditjoeri ada berharga besar. Sekalipoen politie telah bekerdja keras boeat lakoeken pengoesoetan, toch sampe sabegitoe lamanja belon djoega bisa endoes baoe-baoenja.

„Itoe Kang Lam Yan,” demikian kamoedian akoe telah berkata poela „kabarnja ada satoe pentjoeri jang mempoenjai kapandean loear biasa. Di Shanghai, orang kata, doeloe Kang Lam Yan telah lakoeken pembongkar-pembongkar dan lakoeken pentjoerian-pentjoerian besar. Politie di sana jang ada terbantoe oleh sadjoemblah detective-detective jang pande sampe merasa sanget koewalahaan aken

berhadepan dengen ia."

Wat Song masih asik sekali toedjoeken matanya ka itoe tempat dimana tadi ia telah dapatken itoe benda, saolah-olah ia maoe tjari lagi laen matjem barang permata.

„Djangan kata itoe segala politie pasaran,” achir-achir ia berkata „jang tjoema pande tangkep-tangkepin toekang tjopet, pantjalongok, orang berdjoedi dan laen-laen perkara tektek bengek, maski djoega detective biasa tida nanti sanggoep tempoer Kang Lam Yan. Baeklah kita orang tida oesa bitjaraken itoe hal lebi djaoe lagi, sebab sekarang akoe lagi tjoba aken mendoega-doega lantaran apa ini moentiara telah djato di sini.”

— „Apa kaoe soeda dapet tangkep sebab-sebabnya itoe ?”

— „Akoe rasa, lantaran si pentjoeri telah lari dengen goegoep dan djato di itoe goendoekan, maka djoega ini moetiara telah terlempar dari kantongnya. Akoe inget betoel, pada itoe malam waktoe terjadi pembongkaran ada toeroen oedjan, hingga di ini tempat ada litjin dan tentoe kaloe orang berdjalan dengan tindakan pesat bakal terpleset-pleset. Sekalipoen orang jang ada mempoenjai ilmoe berdjalan tjeput, akoe brani pastiken, tida nanti bisa berdjalan di sini dengan laloeasa dan enak, kerna salaen sempit djoega kaloe kena kasirem aer oedjan ada sanget litjin.”

— „Boleh djadi djoega jang kaoe poenja doegahan itoe ada sedikit tjetjok, Wat Song,

tapi apatah rasa-rasanja kaoe sanggoep tangkep Kang Lam Yan?"

— „Ach! Pauw Long, kaoe tida ada niatan boeat bertanding sama Kang Lam Yan. Sebagaimana kaoe soeda taoe dan kenal adatkoe, bahoewa kaoe ini memang soeka sekali mengoesoet dan tjoba mendoega-doega segala perkara jang sabenernja tida begitoe penting bagi kita orang. Kabetoelan kita orang telah dapetin ini saboetir moetiara, dengen zonder disengadja kaoe telah tjoba bikin itoe doega-doegahan."

— „Jah, kita orang tida oesa melantoer jang boekan-koekan dan paling betoel sekarang kita orang haroes berdaja, pada jang mana satoe diantara itoe doeа orang hartawan jang katjoerian, ini barang kita orang haroes bajar poelang."

— „Menoeroet atoeran, ini barang kita orang moesti seraken pada politie dan kasi taoe djoega, di tempat mana kita orang telah dapet ketemoeken, tapi lantaran pentjoerian itoe soeda berdjalan lama dan perkaranja tinggal gelap goelita, maka kaoe rasa bagi pengoesoetan politie djoega tida ada kafaedahannja sama sekali. Ada paling betoel kaloe kita orang tjari laen djalan jang lebi sampoerna."

— „Apa tida lebi baek kita orang bajar poelang sendiri pada orang jang poenja milik?"

— „Itoelah tida bisa djadi. Kaoe toch soeda taoe, bahoewa jang katjoerian barang-barang permata ada doeа orang serta berbareng dalem tempo satoe maleman, sedeng moetiara tida ada

tanda-tanda peringatan. Pada siapa kita orang moesti kombaliken?"

Akoe laloe toendoekken kapala sembari berpikir. Sakoenoeng-koenjoeng ia telah berseroeh: „Ha! Pauw Long!! Liatlah itoe dia, Auw Lan mendatengin ka mari!"

Akoe laloe berpaling dan benar sadja akoe dapet liat boedjangkoe itoe lari mendatengin dengen tergoepoe-goepoe. Koe djadi terkedjoet dalem hati, kerna mengira jang di roema ada kedjadian perkara apa-apa jang tida di'ingin.

„Lekas bilang." Akoe memerenta sebelonnja ia berkata soeatoe apa „Ada perlue apa kaoe dateng ka mari dengen tersipoe-sipoe?"

„Akoe.....akoe," dengen napas memboeroe ia menjaoet „dateng tjari kaoe madjikan."

„Perlouenja?" akoe meneges, sedeng hatikoe djadi merasa lebi tida enak.

— „Ada tetamoe jang maoe ketemoe."

— „Ach.....Itoe toch ada perkara biasa, mengapa kaoe lari tersipoe-sipoe. Dan siapa namanja tetamoe itoe?"

— „Ia mengakoe ada saorang she Soen dan tinggal beroema di djalanan Sip-sin-kee. Kata-nja ia ada mendjadi sobat kekalnja madjikan."

— „Apa brangkali ia itoe ada Soen Kek In? Ia bilang ada kaperloean apa, maka tjari padakoe?"

— „Ia kata, ada oeroesan sanget penting. Njonja madjikan soeroe ia toenggoe, tapi ia minta salekasnja soepaja bisa ketemoe kaoe

madjikan, maka djoega njonja madjikan prenta akoe lekas tjari kaoe sampe dapet."

Akoe djadi heran, kerna tida sari-sarinja Soen Kek In koendjoengin akoe. Betoel doeloe ia ada mendjadi akoe poenja teman sekola, tapi toch belon perna satoe kali, sedari beroemoer dewasa, ia koendjoengin kadiamankoe. Lantaran itoe djoega, akoe merasa sangsi dan berdiri diam sakoetika lamanja.

„Njo kita poelang.” Sobatkoe Wat Song djambret akoe poenja tangan dan berkata lebi djaoe „Tida oesa kaoe bersangsi-sangsi di sini, mentar di roema toch kaoe bakal dapet taoe sebab-sebabnya.”

Demikianlah, disaät itoe djoega k.ta orang laloe berdjalan poelang. Tatkala itoe matahari soeda miring ka barat, sedeng sorotnya jang mementjarken ka moeka boemi poen soeda berroba djadi rada-rada koening, menandaken bahoewa sang hari soeda djadi lohor.

Koetika sampe di roema, akoe dapet liat, betoel si Kek In jang berkoendjoeng dan ia masih berdiri menantiken di depan pintoe. Ditilik dari sorot moekanja seperti djoega ia ada kandoeng niatan perloe.

„Oh, Kek In !” demikian akoe telah menegor „toemben amat kaoe dateng koendjoengin akoe poenja goeboek. Bolehtah akoe dapet taoe kaoe poenja maksoed kadatengan ini ?”

„Tentoe sekali sobatkoe,” ia mendjawab dengan soeara sedikit lesoe „jang akoe bakal toe-

toerken satoe per satoe akoe poenja maksoed kadatengan ini. Lebi doeloe akoe minta dan harep, biarlah kaoe tida djadi koerang seneng lantaran akoe soeda kedja kaoe kaget serta mengganggoe kaoe poenja tempo jang berharga. Akoe poenja maksoed kadatengan tida laen hendak minta kaoe poenja pertoeloengan, sobatkoe."

Akoe manggoetken kepala dan selagi akoe maoe menanja lebi djaoe, ia telah mendoeloein berkata : „Dan apatah ia itoe ada toean Wat Song, jang namanja seringkali kaoe seboet-seboet ?”

Ia berkata begitoe sambil dengen djarinja ia menoendjoek pada Wat Song, sedeng matanja mengawasi dengen roepa seperti orang jang kagoem.

„Betoel,” akoe menjaoet „ia itoe ada sobatkoe kekal Wat Song. Dan tjobalah kaoe bole toetoerken, perkara apa jang kaoe merasa perloe dengen akoe poenja pertoeloengan ?”

— „Boekan sadja perloe dengen kaoe sendiri, tapi djoega akoe perloe toean Wat poenja pertoeloengan. Tadi malem roemakoe telah kadatengan pentjoeri jang berlaloenja dengen gondol akoe poenja barang-barang permata jang berharga kira-kira toedjoe riboe dollar. Si pendjahat telah tinggalken tanda peringatan tiga hoeroef : „Kang Lam Yan” di tembokan dingding roemakoe. Kaoe tentoe ada denger djoega jang itoe gelaran dari si pendjahat sekarang

masi rame dibilitjaraken oleh publiek di ini kota,  
berhoeboeng dengen doea pembongkaran jang  
ia telah lakoeken berselang saboelan lamanja."

---

## III

SATOE PERMINTAHAN  
JANG SANGET.

Mendenger penoetoeranja Soen Kek In, kita berdoea poenja hati djadi sanget terkedjoet dan laloe saling mengawasi satoe sama laen sakoetika lamanja. Kamoedian Wat Song telah kasi tanda padakoe dengen ia poenja mata, soepaja kita orang bitjara di dalem roema sadja, maka djoega akoe laloe adjakin Kek In masoek dan persilaken ia ambil tempat doedoek.

Itoe waktoe hari soeda djadi menggerip dan lampoe-lampoe dalem roemakoe soeda disoeloet. Kena sorotnya itoe penerangan, akoe dapet nampak moekanja Kek In ada sanget poetjat saoepama kertas; ini ada mengoendjoek jang ia poenja hati lagi tertindi dengen kasoekeran besar.

„Toean Wat;” demikian ia moelai berkata „berhoeboeng dengen terjadinya itoe pentjoerian, koelawarga dalem roema tanggakoe semoea soeda djadi sanget terperandjat dan kabingoengan tida taoe tindakan bagimana haroes diambil, malahan iboekoe jang kadoea mendadak djato sakit saking kaget dan mereresnja. Oleh kerna itoe djoega, dengen pengharepan sanget besar akoe dateng ka mari boeat minta kaoe berdoea poenja pertoeloengan.”

„Baroesan kaoe ada bilang,” Wat Song menjawab „bahoeva itoe pentjoerian telah dila-

koeken oleh Kang Lam Yan? Kaloe bener begitoe, akoe rasa ada lebi betoel djika kaoe mengadoe pada politie, soepaja bisa lekas dilakoeken pengoesoetan. Lantaran akoe ini boekan ada satoe detective, maka sekalipoen akoe nanti bekerdja djoega, toch bakal tida membri hasil jang diharep."

„Semalem djoega,” Kek In berkata „akoe soeda soeroean orang boeat rapport pada pem-besar politie. Ajahkoe jang memang tida ada kapertjaahan pada pendjaga keamanan di ini kota, jaitoe lantaran doeа pentjoerian jang ter-djadi selang saboelan lamanja sampe ini djam belon ada kabar tjeritanja, maka maski tjoema sedikit tida ada harepan jang politie mampoeh bikin terang itoe perkara. Ajahkoe laloe prenta saorang nama Ang Hok boeat lakoeken peng-oesoetan. Maski ia ini ada saorang jang tjerdk dan mempoenjai sedikit kapandean, tapi akoe rasa tida nanti aken mampoeh bekerdja dengen mendapet hasil, kerna ia boekan ada tandingan-nya si pentjoeri jang namanja soeda terkenal di seloeroe Tiengkok. Sedari tadi malem akoe telah poeter otak pergi dateng dan achir-achirnja, tadi lohor akoe dapet inget kaoe poenja nama jang seringkali sobatkoe Pauw Long seboet-seboet di depankoe. Akoe laloe voorstel pada ajahkoe soepaja minta kaoe poenja per-toeloengen, jang mana ajahkoe menjataken moefaketenja; ia sigra prenta akoe dateng ka mari boeat minta itoe pertoeloengen. Akoe

harep dengen sanget, biarlah kaoe tida menampik."

„Soenggoe toean Soen," Wat Song mendjawab sembari tersenjoem „akoe merasa sanget menjesel, lantaran akoe tida mempoenjai kapan-dean atawa pengartian sabagimana kaoe ada doega, maka akoe poen tida brani loeloesken permintahan kaoe itoe. Akoe harep kaoe tida djadi goesar."

Abis berkata demikian Wat Song liriken matanja padakoe, maka akoe poen lantes mengarti maksoednja, jaitoe maski djoega ia poenja moeloet menjataken tida maoe dan oendjoek kabratan, tapi dalem hatinja ia sanget ingin sekali boeat tjoba lakoeken pengoesoetan lebi djaoe ; hal mana telah membikin hatikoe merasa tida enak, kerna akoe pikir, kaloe ia nanti sanggoepin dan lakoeken itoe pakerdahan jang sanget berat, soenggoe ada berbahaja sekali bagi kaslametan dirinja. Pertama, maski djoega Wat Song ada saorang tjerdk, p nde dan berpikiran terang, tapi toch ia belon mempoenjai pengalaman dalem itoe pakerdahan. Kadoea, si pentjoerì salaennja soeda oeloeng, djoega namanja sadja soeda tjoekoep membikin orang poenja boeloe badan djadi berdiri. Maski bagimana djoega, akoe rasa ia boekan ada tandingannja itoe pendjahat.

„Toeant Wat," kombali Kek In meminta-minta „akoe harep dengen sanget biarlah kaoe tida menampik atas permintahankoe tadi. Kaloe

sadja kaoe poenja pakerdjahian soeda berhasil, tentoe sekali akoe poenja koelawarga saroema tangga tida nanti loepaken kaoe poenja boedi jang teramat besar itoe."

„Maäfkenlah toean Soen,” Wat Song menjaoet „bahoewa akoe soeda tida brani loeloesken itoe permintahan boekan dari sebab akoe tida soeka, tapi djoestroe lantaran kepaksa, jaitoe sebab dengen sasoenggoenja djoega akoe belon mempoenjai pengalaman dalem perkara saroepa itoe.”

„Oh, sobatkoe Pauw Long, ia laloe berkata sembari memandeng padakoe „akoe pertjaia jang kaoe tentoe tida tega hati, dan soeka bantoe boedjoek toean Wat sampe ia maoe kabaelken akoe poenja permintahan.“

Lantaran mendenger itoe ratapan, hatikoe djadi mendelong dan mendadak timboel rasa kesian pada Soen Kek In, maka djoega akoe laloe tjoba bantoe memboedjoek sambil berkata: „Wat Song, akoe rasa ada baeknja djoega kita lakoeken pertjobahan. Bagimana dengen pendapatan kaoe?“

„Jah, kaloe tjoema bikin pengoesoetan sadja,“ sobatkoe itoe mendjawab „memang djoega akoe tida ada kaberatan soeatoe apa, tjoema boea atawa hasilnya pengoesoetan itoe di blakang hari akoe tida brani tanggoeng.“

„Kaloe sad a kaoe soeda menjataken soeka lakoeken itoe pengoesoetan,“ Kek In tjampoer berkata „boleh dikata kaoe soeda membriken

pertoeloengan padakoe, masatah akoe brani tjela atawa toemplekin kasalahan pada kaoe, kaloe oepamanja tida berhasil dalem itoe pengoesoetan ?“

„Tapi,“ Wat Song berkata poela „sabelonnja kita orang brangkat lakoeken pапreksahan tentang tanda-tanda, akoe harep kaoe soeka toe-toerken satoe per satoe doedoeknja itoe perkara pentjoerian, jaitoe soepaia akoe nanti bisa mendoega-doega, tjara bagimana akoe moesti mengoesoet.“

Roepanja bermoela Kek In merasa sangsi, tapi kamoedian ia telah menoetoer djoega seperti brikoet di bawa ini :

„Waktoe terjadinya itoe pentjoerian,“ demikian ia bitjara dengen sabar „pada djem poekoel brapa, ini akoe tida bisa tetepken. Ijoema kira-kira diantara poekoel sapoeloe sampenja poekoel satoe liwat tengah malem, kerna tadi malem liwat sedikit poekoel satoe ajahkoe baroe sadja poelang nonton opera, sedeng kira-kira poekoel sapoeloe, baboe dji-mabaroe sadja atoer bikin beres pembarangan ; di dalem kamar ia tjoema dapet liat iboekoe kadoea doedoek membatja boekoe dengen sendirian. Pendek kata di sitoe tida ada soeatoe apa jang bisa menerbitken perasahan tjoeriga. Satoe boedjang jang memang akoe prenta mendjaga telah boekain pintoe koetika ajahkoe poelang nonton. Orang sadalem roema semoea soeda pada tidoer poeles. Dengan tida sekali merasa

tjoeriga ajahkoe teroes sadja berdjalanan masoek ka kamar. Ia djadi sanget terperandjat, tatkala dapet nampak bebrapa peti soeda terboeka, pakean-pakean tersebar di sana sini, sedeng iboekoe kadoea kadapetan tidoer sembari toetoepin moekanja dengen kapala tertendojang oleh medja. Barang-barang permata jang satoe antaranja tjintjin mata brilliant berharga ampat riboe dollar telah linjap. Ajahkoe laloe bangoenin iboekoe kadoea itoe dan satelah tersedar laloe dioendjoekken itoe semoea barang jang berarak-an. Ia itoe tjoema berdiri terlongong-longong sembari koetjek-koetjek matanja seperti orang kasima. Koetika ditegor oleh a ahkoe, ia tjoema bisa bilang, lantaran kliwat ngantoek ia tidoer di sitoe, tida inget boeat pinda ka pembarangan. Semoea kedjadian-kedjadian ia tida taoe sama sekali. Boedjang-boedjang jang soeda pada menggeros poen semoeanja laloe dibangoenin dan satoe per satoe ditanja oleh ajahkoe. Iaorang semoea tjoema letletken lidanja dan maski tjoema sedikit poen tida bisa kasi keterangan. Kamoedian satelah dilakoeken papreksahan lebi djaoe, orang dapetken kanjatahan, bahowea di tembokan dari kamar terseboet ada terloekis tiga hoeroef Kang Lam Yan. Pintoe blakang dari roemakoe telah roesak, ini ada mengoendjoek bahowea si pendjahat telah ma-soek dengen ambil djalan dari sitoe. Nah, tjoema sabegitoe sadja jang akoe mampoeh briken katerangan pada kaoe, toean Wat."

Wat Song mendengerin penoetoeran itoe dengen penoe perhatian dan kamoedian laloe berkata : „Doedoekna ini perkara pentjoerian ada sanget aneh. Kasebatan dan kapandeannja si pentjoeri haroes dikagoemin djoega. Tapi bagimana dengen pendapetan politie ?“

„Pembesar politie mendoega dengen pasti,“ Kek In menjaoet „bahewa Kang Lam Yan soeda bisa bebena dalem roemakoe dengen terbantoe dari sabela dalem, maka akoe poenja boedjang Louw Eng, jang akoe prenta mendjaga pintoe menantiken ajahkoe poelang, telah ditahan dalem kantoor politie.“

— „Dan, siapa adanja itoe orang jang tadi namanja kaoe seboet Ang Hok ?“

— „Orang itoe ada penganter jang setia dari ajahkoe dan telah mengikoet ajahkoe sedari doeloe, waktoe ajahkoe masih pegang pangkat di provincie Tit-lee. Ia ada saorang jang tjerdk dan sanget taba. Sajang itoe malem ia soeda anter ajahkoe pergi nonton opera, tjoba ia tinggal di roema, akoe rasa dengen mengandel ia poenja katjerdikan dan kabranian, tida nanti si pentjoeri mampoeh sampeken maksoednja.“

— „Apa ia sekarang lagi tjoba lakoeken pengoesoetan ?“

— „Jah, lantaran doeloe djoega koetika di roemakoe doe kali kabongkaran, ia jang soeda bisa bikin terang doedoekna perkara. Pada waktoe paling blakang tatkala ajahkoe kailangan horloge mas jang ditjopet oleh satoe padri

jang koeliling djalan minta derma, djoega ia jang soeda bisa dapetken kombalí itoe barang ; maka djoega ajahkoe ada taro kapertjajahan besar sekali padanja.“

— „Apa ia soeda perna menjataken soeatoe apa berhoeboeng dengen pentjoerian jang terjadi semalem ?“

— „Belon, tapi roepanja ia merasa tida senang sekali sama itoe pembesar politie jang soeda tahan Louw Eng dalem kantoornja.“

— „Soeda tjoekoep ! Dengan itoe pengoendjoekan-pengoendjoekan jang kaoe briken akoe moelai dapet tangkep sedikit dan taoe sebagian ketjil doedoeknja perkara. Njo, sekarang djoega kita orang brangkat ka roema kaoe boeat liat bekas - bekasnja jang si pendjahat tinggal-ken.“

Begitoelah kita orang bertiga laloe brangkat djalan bersama-sama. Dalem itoe perdjalanan menoedjoe ka roemanja Kek In, akoe ada menoetoerken sedikit riwajatnja kaoem koelawarga Soen, agar sobatkoe Wat Song mengetahoei. Bahewa ajahnja Kek In ada bernama Soen Sioe Kin. Ia ini perna pangkoe djabatan assistent resident di ini kota (Gouw-boen), tapi blakangan ia soeda letakken itoe pangkat lantaran merasa bosen djadi ambtenaar dan ingin hidoepl sebagai orang particulier.

Tida lama kamoedian kita orang telah sampe di roemanja itoe koelawarga jang kabongkaran.

Roema itoe ada model Tionghoa koeno, maka djoega ada makan tempat sanget loewas, tapi tida begitoe tinggi. Kita orang berdjalan masoek, di satoe kamar jang rada sempit kita orang dapet liat satoe anak ketjil lagi doedoek bebena ini dan itoe. Kek In bilang, jang kamar terseboet ada kamarnja Louw Eng, jang mana sebab ia ditahan oleh politie, maka pakerdjahannja digantiken oleh si botja.

Satelah memandeng kita orang sabentaran, botja itoe lantes lari masoek ka dalem roeangan pertengahan, tapi Kek In tida perdoeliken itoe, hanja teroes adjak kita orang bertindak lebi djaoe.

Koetika sampe di pertengahan, Sioe Kin telah kaloear menjamboet. Akoe liat, kira-kira ia baroe beroemoer antara ampat poeloe taon. Diliat dari tampang moekanja lantes bisa di-djoega, bahoewa ia ada saorang jang sabar, sedeng ditilik dari pri lakoe dan tjara-tjaranja djalanken peradatan, ada mengoendjoek jang ia itoe ada saorang terpladjar. Tatkala itoe ia poenja moeka jang sabar ada kaliatan poetjat, sedeng matanja jang djeli masoek ka dalem (legok). Maski djoega ia itoe ada memake pakean dari wol (kaen panas), tapi toch sabentar-bentar bergidik seperti orang jang kadinginan. Akoe rasa itoe kedjadian semalem jang kedja ia sanget berdoeka hingga koerang tidoer.

Kerna akoe memang soeda lama djoega kenal padanja, maka akoe menghamperi lebi doeloe

dan membri hormat ; kamoedian baroelah akoe perkenalken ia dengen Wat Song. Ia sigra djabat tangannja sobatkoe Wat Song sembari kasi banjak poedjian, jang mana soeda dibales oleh sobatkoe itoe dengen merendaken diri,

Kita orang laloe diadjak masoek ka dalem kamar boekoe, dimana ia silaken kita orang berdoedoek.

„Semalem pentjoeri telah gondol barang-barang permata milikkoe berdjoembla sanget besar,“ Sioe Kin moelai berkata „dan berhoe-boeng dengen itoe, istrikoe telah djato sakit. Pembesar politie jang tjetet kita poenja pengadoean, tadi pagi ada bilang, lantaran si pentjoeri soeda terkenal oeloengnja, maka harepan boeat bisa tangkep ada sanget ketjil. Soeda lama djoega akoe kenal kaoe poenja nama jang seringkali orang seboet-seboet, maka dengen sanget akoe minta kaoe poenja pertoeloengan boeat bantoe lakoeken pengoesoetan. Kaloe seandenja si pentjoeri dapet dibekoek, sedeng barang barang milikkoe didapet kombali, soeng goe toean Wat, maski djoega sampenja doenia kiamat, tida nanti akoe loepaken kaoe poenja boedi dan pertoeloengan itoe.“

„Akoe sendiri,“ Wat Song menjaoet „tida brani terlaloe harep berhasilna pengoesoetan jang akoe maoe tjoba lakoeken, kerna pertama akoe belon mempoenjai pengalaman dan kadoea memang akoe tida ada toentoet penghidoepan demikian. Soenggoe tjoba tadi tida diminta de-

ngen paksa-paksa oleh kaoe poenja anak, tentoe sekali akoe tida brani berlakoe gegaba, boeat sanggoepin bri bantoean mengoesoet itoe perkara soelit jang tida boleh dipandeng enteng.“

„Jah, tapi akoe sampe pertjaia,“ kamoedian Sioe Kin berkata poela „bahoewa kaoe jang nanti bakal bisa terangken itoe perkara pentjoerian besar jang sanget gelap.“

Wat Song kaliatan mesam.

„Doedoeknja itoe perkara pentjoerian,“ berkata Wat Song kamoedian „maski djoega akoe soeda dibriken keterangan oleh kaoe poenja anak, tapi akoe masih merasa perloe boeat menanja lebi djaoe pada kaoe. Apa kaoe bersedia boeat membri keterangan jang akoe inginken ?“

— „Tentoe sekali akoe bersiap boeat briken djawaban satoe per satoe pertanjahan jang kaoe nanti madjoeken.“

— „Semalem, djam brapa kaoe pergi nonton dan djam brapa kaoe poelang ?“

— „Acoe brangkat nonton poekoel satenga sapoeloe dengen dianter oleh Ang Hok dan poelang poekoel doe belas tengah malem. Itoe waktoe boedjang Louw Eng masih doedoek di samping pintoe menantiken kadatengankoe. Keadahan dalem roema masih seperti biasa ; tapi akoe menjadi sanget terkedjoet tatkala masoek di kamar, nampak peti pakean jang soeda diboeka serta isihnya berarakkan kalang kaboot. Lantaran itoe djoega, baroelah akoe mendoega jang pentjoeri telah bebenain milikkoe.“

— „Selandjoetnja dari itoe akoe soeda taoe.  
Nah tjoba njo anterken akoe ka tempat di-  
mana pentjoeri soeda menggeratak.“

— „Baek dan marilah kita djalan bersama  
sama.“

Kita orang lantes mengikoeti toean roema,  
masoek ka dalem roema dari pekarangan jang  
katiga. Kita orang doedoek di roeangan depan  
kamar tidoernja toean dan njonja roema.

---

## IV.

## TANDA BEKAS TELAPAKAN KAKI.

Kita orang menantiken dengen roepa koerang sabar, pada itoe baboe dji-ma jang lagi pergi ambil penerangan.

„Di sinilah ada akoe poenja kamar tidoer,” Sioe Kin berkata sambil menoendjoek dengen djarinja „dan di blakaagnia ini kamar ada lagi satoe kamar ketjil jaitoe tempat pembaringan-nya dji-ma. Dari itoe roeangan terboeka jang sempit ada satoe djalanan jang masoek ka ke bon. Didoega pentjoeri soeda masoek dengen ambil djalan dari sitoe.“

Sabelonnja Wat Song berkata-kata, baboe dji-ma telah dateng menghamperi dengen bawa lampoe. Kitaorang laloe mengikoeti Sioe Kin masoek ka dalem ia poenja kamar.

„Maka akoe sengadja ambil djalan dari ini pintoe samping,” demikian sembari menindak toean roema telah berkata „sebab itoe pintoe jang besar ada bekas diboeat djalan masoek oleh si pentjoeri, maka akoe laloe rapetin sadja soepaia tanda bekas telapakan kakin a pendjahat terseboet djangan sampe tertjampoer sama telapakan kaki laen orang.“

Wat Song manggoetken kapalanja dan kita orang sigra djoega soeda berada di dalem kamar. Dalem kamar ini ada sanget terang kena soron-nya lampoe; tjoemalah semoea djendela ditotoeop rapet-rapet, hingga akoe jang baroe

dateng dari tempat terboeka, rasaken hawa di sitoe ada 'ngap. Djoega sobatkoe Wat Song kaliatan lebi 'ngap dari pada akoe,—sabentar-bentar ia poenja idoeng bersegrak-segroek.

„Mengapa itoe djendela-djendela ditoetoep begitoe roepa?“ Wat Song menanja „hingga hawa di sini ada sanget panas dan rasanja 'ngap.“

„Maäfkenlah toean Wat,“ toean roema menjawab „lantaran istrikoe dalem keadahan sakit, makz akoe koeatir kena serangannja angin.“

„Akoe rasa, kata Wat Song „ada lebi baek kaloe semoea djendela itoe dipentang sadja, kerna njonja toch djato sakit lantaran kaget, jang mana djoestroe perloe dapetken hawa jang bagoes serta seger.“

Maski djoega roepanja toean roema ada koerang moefaket dengen itoe advies, tapi toch dengen roepa kepaksa telah pentang djoega satoe diantara daonnya pintoe djendela terseboet.

Akoe liat kamar itoe potongannja ada sedikit loewas dan pandjang, teratoer beres dan dirawat dengen apik serta bresi. Deket pada podjokan sabela lor ada terletak satoe tempat tidoer besi oekoeran besar, jang klamboenja ditoetoep sanget rapet; dari dalem jang mana tjoema ada kadengeran soeara keloeh kesahnja orang sakit.

Di samping kanan deket tempat tidoer besi itoe, ada terletak tiga peti di atas tana, jang semoea terboeka toetoepannja dan roema koentjinja bekas diroesakin. Di sana sini deket

itoe peti ada bebrapa lembar pakean jang berarakan sanget koesoet.

„Moelai dari semalem,“ toean roema bilang „keadahannja masih tinggal tetep sebagi ini; maski tjoema sedikitpoen akoe belon roba. Ini satoe peti Toean, jang diboeat menjimpen itoe barang-barang permata; tadinja ditoempoek dengan rapi, sama itoe doeaa peti jang laen.“

„Djadi tjoema ini satoe peti sadja;“ Wat Song meneges lebi djaoe „jang ada diboeat simpen itoe barang-barang permata?“

— „Jah, betoel!“

— „Apatah ada djoega pakean jang tertjoeri?“

Sioe Kin gojangken kapalanja, sedeng Wat Song lantes preksa dengan teliti, satoe per satoenja peti itoe.

„Menoeroet pendapetankoe,“ akoe berkata „si pentjoeri masih belon merasa tjoekoep dengan tjoema dapetin sabegitoe banjak barang-barang permata, maka ia lantes tjoba roesakin doeaa peti laennja dengan pengharepan boeat dapat lebi banjak barang jang di'inginken, tapi tatkala ia dapat kanjatahan peti jang laennja, tjoema berisi pakean meloeloe, ia laloe tinggalken begitoe sadja.“

Akoe djoega,“ toean roema berkata „rasa begitoe.“

Lebi djaoe ia adjakin kita memereksa di blakang tempat tidoer, dimana dengan djarinja ia mengoendjoek dinding tembok jang ada ter-

loekis tiga hoeroef: „Kang Lam Yan“. Toelisannja ternjata ada begitoe poenja djelek.

„Ini tiga hoeroef seperti soeda ditoelis dengen sapotong areng,“ katanja Wat Song satelah menghamperi lebi deket dengen perhatiken sabentaran „tapi ini toelisan tida bisa dibilang bagoes.“

„Jah, betoel;“ Sioe Kin berkata „apa boleh djadi sebab ditoelis dengen terboeroe-boeroe?“

Wat Song manggoetken kapalanja dan sigra djoega kita orang berlaloe dari sitoe.

„Sekarang,“ achir-achir Wat Song berkata poela „baroelah akoe merasa perlue boeat preksa tanda bekas telapakan kaki.“

Ia laloe minta lampoe jang dipegang oleh toean roema, kamoedian dengen penerangan terseboet ia soeloechin itoe tanda-tanda sembari djongkok. Ia preksa dengen perhatian besar.

Akoe liat itoe tanda bekas telapakan kaki, jang depan ada besar dan njata, sedeng jang blakang ada lebi ketjilan serta koerang teges. Wat Song laloe bikin gambar dan kamoedian ambil oekoeran pandjangnja tindakan.

„Ini tanda bekas telapakan,“ Wat Song berkata „seperti tanda bekas telapakan sepatoe koelit jang soeda ampir bedjat. Menoeroet doegahankoe, orang jang pake ini sepatoe tentoe berbadan ketjil dan kare.“

Lebi djaoe lagi Wat Song menghamperi pintoe, ia angkat palangnja dan pentang daon-nja pintoe terseboet.

„Apatah ini pintoe,“ kamoedian ia menanja sambil berpaling pada Sioe Kin „memang sedari semalem soeda dipalang begini roepa?“

„Tida, toean,“ toean roema menjaoet „kerna istrikoe ada menantiken kadatengankoe, maka djoega ia rasa tida perloe moesti dipalang.“

Satelah manggoetken kapala, Wat Song laloe soeloe hin tanda bekas telapakan kakinja si pentjoeri, menoedjoe ka loear dari: pintoe jang teroes ka blakang, dimana koetika sampe di kebon jang ada didiriken satoe goeboek, ia lantes merandek dan menanja: „Apatah goeboek ini ada orang jang tinggalin?“

„Doeloe ada ditinggalin oleh akoe poenja toekang kebon,“ Sioe Kin mendjawab „tapi sekarang ditinggal kosong.“

— „Dan, itoe toekang kebon sekarang tinggal di mana? Apa ia pinda ka laen roema?“

— „Lantaran ternjata jang ia itoe ada satoe pemaentopan jang oeloeng dan maski soeda berka!i-kali akoe larang tapi masih sadja membandel, maka soeda selang doe minggoe akoe lepas ia tida dengen hormat.“

Wat Song keroetin djidatnja, seperti orang jang lagi asik berpikir.

„Ach! Soenggoe sajang sekali“ achir-achir ia telah berkata „tjoba orang itoe masih bekerdja dan tinggal di sini, tentoelah ia dapet taoe terang waktoe si pendjahat meroesak pintoe ini. Dasar bintangnja itoe pentjoeri ada terang, maka ia soeda dapet satoe koetika jang bagoes.

Apa itoe bekas toekang kebon ada mengarti soerat ?“

„Kenal djoega ;“ djawabnja Sioe Kin „akoe poenja boedjang-boedjang katjoeali dji-ma sa-orang, semoea ada mengenal mata soerat, maski tjoema sedikit-sedikit.“

Kombali Wat Song manggoetken kapalanja dan kamoedian berdjalanan poela, dimana koetika sampe di pintoe paling pengabisan, kita orang dapet nampak tanda bekas telapakan kaki jang lebi teges dan njata. Bekas telapakan jang masoek ada lebi tandes dari pada tanda bekas telapakan jang ka loear. Ini pintoe roepanja ada bikinan baroe, kerna salaen dari slotnja ada menoeroet model Europa djoega ada ditjat hingga begitoe poenja aloes serta litjin. Pintoe terseboet ada ditindi dengen satoe batoe besar jang beratnja didoega ada ratoesan kati.

„Palang pintoe dan roema koentji ini,“ Wat Song mengoetaraken pendapetannja „ada tjoekoep koeat, hingga tjoema perkakas jang bagoes serta tadjem sadja jang boleh digoenaken boeat meroesakin. Ini batoe jang ada begini poenja besar djoega soeda berkiser dari tempatnja ; menoeroet doegahankoe, si pentjoeri tentoe ada bertenaga sanget koeat. Sesoeda bisa roesakin roema koentji dan ini palang pintoe, laloe dorong daon pintoe dengen sakoeat-koeatnja tenaga.“

Abis berkata demikian Wat Song lantes kiserken daonnja pintoe, jang mana lantaran terhalang oleh itoe batoe besar, maka tjoema

bisa terpentang sedikit sadja dan tida tjoekoep boeat djalan satoe orang. Di sabela loear pintoe terseboet ada toemboe roempoet jang sanget soeboer, hingga bekas telapakan kakinja si pentjoeri tida bisa dipreksa lebih djaoe. Terpisa tida sabrappa djaoe dari itoe pintoe, ada berdiri satoe grejja toea jang dinamaken Tjoa-sin-bio, jang di dektnja pintoe depan sabela kanan dan sebla kirinja, ada dipasang doe singa batoe. Keadahan di ini tempat ada amat soenji.

„Itoe klenteng,” Sioe Kin berkata sambil tangannya menoendjoek pada gredja Tjoa-sin-bio „ada didjaga oleh saorang toea jang soeda reot. Berhoeboeng dengen terdjadinya pentjoerian dalem roemakoe, ia soeda tettoeroetan ditangkep dan boleh djadi sampe ini djam masih ditahan di kantoor politie, kerna tjobalah liat keadahan di sana jang ada begitoe poenja gelap dan soenji senjap.“

Satelah abis berkata, Sioe Kin mengela napas pandjang. Roepanja ia sanget menjesel atas kagoblokannja politie di sini, jang maen sembarangan tangkep orang dan rampas kamerdi-kannja.

Akoe laloe pasang mata memandeng ka sana mari. Antara tigapoeloe kaki djaoenja akoe dapet nampak satoe tempat aer (djembangan) jang terbikin dari tana. Akoe laloe menghamperi itoe tempat, dimana akoe dapet liat bahoewa di sapoeternja tempat aer itoe tananja sanget betjek serta kliwat kotor.

„Ha! Wat Song!!“ akoe berkaok „kombali di sini roepanja ada tanda-tanda bekas telapakan kaki. Tjobalah kaoe boleh soeloechin dan preksa.“

Dengen tindakan pesat Wat Song laloe menghamperi tempat dimana akoe lagi berdiri,

„Jah, betoel sekali!“ ia berseroe „itoe ada tanda bekas telapakan jang pertama. Tapi soenggoe akoe merasa heran, mengapa perginja ia tida ambil djalan djoega di sini?“

„Menoeroet pendapatan dan doegahankoe,“ begitoe akoe berkata „lantaran keadahan di sini ada sanget gelap, maka itoe pentjoeri soeda kasalahan atawa tersasar mengindjek ini tana jang betjek, hingga sepatoenja kena loempoer, maka djoega ia soeda tinggalken itoe bebrapa tanda bekas telapakan kaki di dalem roema. Selamanja ia bebena di dalem kamar, sepatoenja mendjadi kering, maka djoega berlaloenja tida ada tinggalken sedikit bekas.“

„Doegahan kaoe ada banjak tjotjoknja,“ ia berkata sembari manggoet manggoetken kapalanja „dan akoe ada sanget perloe dengen ini pengoendjoekan tanda-tanda.“

Satelah preksa dan perhatiken tanda-tanda itoe, ia laloe mendeketin pada Sioe Kin seraja menanja : „Apatah dalem kaoe poenja roema masi ada laen pintoe temboesan lagi?“

„Soeda tida ada lagi,“ Sioe Kin menjawab „katjoeali ini satoe dan jang laen pintoe besar di loear.“

Lagi-lagi Wat Song manggoetken kapalanja.

„Ha, Ouw Tay!“ begitoelah sasoeda berpaling Sioe Kin bekaok, jang mana koetika akoe dan Wat Song djoega toeroet menengok ka satoe djoeroesan, dapet liat saorang bongkok jang djalan sempojongan bertindak menoedjoe ka itoe gredja toea.

Itoe orang jang dikaokin oleh Sioe Kin laloe menghamperi kitaorang.

„Dan . . .“ kamoedian Sioe Kin menanja „apatah sekarang kaoe soeda dimerdikaken kombali?“

Betoel ;“ jawabnya itoe orang toea „soenggoe akoe merasa heran sekali, bagimana politie soeda menoedoe padakoe serta madjoeken pertanjahan-pertanjahan sanget melit, jaitoe seperti : Apa kaoe semalem ada dapet denger soeara jang menoerigaken dan laen-laen poela jang kabanjakan akoe soeda loepa inget. Akoe tjoema briken djawaban, tida taoe dan tida denger soeatoe apa. Ia masih sadja tjoerigaken akoe dan laloe sekep akoe dalem kammar tahanan. Lebih tjilaka lagi saben saben akoe diantjem bagini dan bagitoe, toean Soen. Blakangan satelah kaoe poenja orang kaper-tajahan Ang Hok dateng minta, baroelah akoe dan djoega kaoe poenja boedjang Louw Eng dilepaskan. Akoe poenja trima kasi atas kaoe poenja kamoerahan itoe.“

„Ach, soenggoe bintang kaoe memang lagi gelap. Dan, apatah memang behar semalem kaoe tida dapet denger soeara jang menoerigaken?“

„Tida, toean Soen, akoe tida dapet denger itoe soeara jang kaoe maksoedken; akoe soeda tidoer antara poekoel toedjoe atawa poekoel delapan. Akoe sendiri poen tida abis pikir jang semalem akoe soeda tidoer sanget njenjak, lebi njenjak dari biasanja.“

„Apatah dalem brapa hari jang laloe,“ sekarang sobatkoe Wat Song jang menanja, kaoe ada liat orang jang mengintip-intip atawa liat-liat keadahan di ini tempat?“

„Ada!“ djawabnja itoe orang toea, satelah keroetken djidatnja berpikir sedikit lamahan „brapa hari dimoeka, akoe dapet liat saorang jang djalan wara-wiri di ini tempat. Diliat dari gerakan-gerakannja ada menoerigaken.“

— „Hei! Apatah kaoe masi bisa petaken roepa atawa matjemnja orang itoe?“

— „Sajang! lantaran tatkala itoe akoe tida liat dan perhatiken moekanja, hingga tida bisa menoetoerken itoe pada kaoe. Tapi akoe masi inget betoel, bahoewa orang terseboet ada berpengawakan ketjil serta kate.“

Selagi Wat Song hendak menanja lebi djaoe, koenjoeng-koenjoeng satoe boedjang ketjil telah mendatengin dengen tersipoe-sipoe dan kasi taoe, bahoewa Louw Eng dan Ang Hok soeda poelang bersama-sama satoe detective gouvernemant, maka kita orang poen lantes berlaloe dari sitoe dan masoek\* kombali ka dalem roema.

---

## V

TJARA BEKERDJA DETECTIVE  
DJEMPOL.....

Ang Hok ada saorang jang kira-kira ber-oemoer tigapoeloe taon lebi sedikit. Ia poenja pengawakan ada tegap tapi pendek, sedeng djalannja ada tjepet dan tindakannja enteng; ini ada mengoendjoek, bahoewa ia tentoe ada pande ilmoe silat. Samentara ia poenja sorot mata jang tadjem ada mengoendjoek, bahoewa Ang Hok tentoe saorang tjerdk. Tatkala itoe ia ada memake badjoe jang terbikin dari soetra aboe-aboe dan pada djarinja ada menempel tjintjin mas. Ini ada oendjoek perbedahanja diantara bebrapa boedjang jang laen dan djoega orang lantes bisa doega, jang ia tentoe ada dapet kapertjaiahan besar dari madjikannja.

Dengan menjaksiken sendiri keadahannja Ang Hok, akoe djadi pertjaja betoel apa jang tadi Kek In soeda toetoerken di roemakoe, jaitoe fatsal kapandean dan katjerdikannja ia itoe mengoesoet perkara jang soeker dan soelit.

Koetika kita orang bertindak masoek ka dalem satoe roeangan pertengahan, Ang Hok jang lagi menantiken di sitoe laloe memandeng akoe dan Wat Song, kamoedian ia bongkoken badannja membri hormat. Roepanja ia taoe, siapa adanja kita orang berdoea.

Lebi djaoe ia lantes madjoe menghamperi

madjikannja dan berkata dengen soewara Pak-khia : „Toean ! Sasoedanja akoe minta dengen sanget serta kasi keterangan pada pembesar politie, jaitoe sedeng pentjoeri ambil djalan dari pintoe blakang adalah Louw Eng mendjaga ki pintoe sabela depan, jang mana lantaran letaknja kamar jang dimasoekkin pentjoeri ada terpisa djaoe, hingga tentoe sekali soeara tindakan tida bisa didenger, baroelah pembesar pendjaga keamanan itoe tida menjangka Louw Eng ada berkongkol sama si pendjahat serta lantes merdikaken ia. Akoe tida pertjaia Louw Eng maoe berkongkol sama pendjahat boeat meroegiken madjikan sendiri, kerna ia toch soeda bekerdja doeapoeloe taon lamanja dengen baek dan setia.“

„Itoelah ada oendjoek, Sioe Kin berkata „pembesar politie di sini poenja kabodoan.“

Wat Song mendengerin itoe sembari pasang koeping.

„Politie poenja perboeatan itoe,“ demikian achir-achir sembari memandeng Wat Song dan kasi liat mesamnja, Ang Hok berkata lebi djaoe „sasoenggoenja ada sanget tida patoet. Akoe pertjaja bahoewa toean Wat djoega ada beranggепan demikian, boekan ? Siapatah jang tida kenal nama dan kapandeannja toean Wat Song dalem hal mengoesoet perkara-perkara soeker dan soelit !“

Dengen mendadak moekanja sobatkoe Wat Song djadi beroba sanget mera, roepanja ia

merasa maloe mendenger poedjiannja Ang Hok jang bisa djoega diartiken satoe sindiran.

„Toean!“ lebi djaoe lagi Ang Hok berkata sambil mengawasi madjikannja „Itoe detective dari Gouvernement sekarang lagi menoenggoe di pertengahan depan, maoe ketemoe dan bitjara pada kaoe.“

Kita orang lantes bertindak ka loear. Detective itoe jang ada berpengawakan tegap serta kaliatan gaga sekali sikepnja, lagi djalan moendar mandir di pertengahan depan, sedeng sabela tangannja ada pegang sabatang sigaret. Ia laloe menjamboet kita orang serta djalanken peradatan. Kamoedian kita orang masing-masing ambil tempat doedoek.

„Toean Soen!“ detective itoe berkata dengan soeara keren „Menilik doedoekna ini perkara pentjoerian jang roewet dan tjaranja dilakoeken pembongkaran jang loear biasa tjepetnja, akoe lantes bisa doega, bahoewa pentjoeri jang lakoeken itoe pembongkaran ada satoe bangsa tjang soeda oeloeng dengan dapet djoega bantoean dari sabela dalem ini roema. Tapi menoeroet katerangannja Louw Eng, sedari kaoe kaloebar, ia teroes diaga dan menoenggoe di pintoe pertengahan depan; ia tida liat sabidji menoesia jang berdjalan dan tida mendenger soeara jang bisa menerbitken perasanhan tjoeriga. Inilah soenggoe ada membikin akoe djadi merasa amat heran. Lantaran itoe djoega, akoe sengadja dateng ka mari boeat

minta kaoe poenja perkenan aken bikin pertanjahan-pertanjahan lebi djaoe pada kaoe poenja boedjang-boedjang dalem ini roema.

Permintahannja detective itoe roepanja soeda membikin toean roema merasa tida seneng hati, tapi toch ia soeda loeloesken djoega dengan sanget kepaksa.

„Kaloe dirasa ada berfaeda bagi penjelidikan jang kaoe bakal lakoeken,” demikian achir-achir, sasoeda diam sabentaran, toean roema telah berkata ..akoe tida kaberatan boeat loeloesken itoe permintahan.“

Boedjang-boedjangnya familie Soen jang semoea tjoema berdjoembla ampat orang (Louw Eng kira-kira soeda beroemoer 60 taon lebi, dji-ma, toekang masak dan itoe boedjang ketjil) lantas dikoempoelken djadi satoe. Iaorang kaliatan sanget koeatir dan takoet sekali meliat keangkerannja itoe detective.

Dengan soeara keren sang detective lantas moelai madjoeken roepa-roepa pertanjahan pada Louw Eng, itoe toekang masak dan boedjang ketjil, tapi senantiasa ia dapet djawaban „tida taoe, sebab akoe lagi tidoer enz. enz.“

Dji-ma jang kamarnja ada berdeketan sama kamar madjikannja, jang teroetama telah ditjoe-rigain dan ia ditanja lebi melilit; lebi djaoe ada seperti brikoet' di bawa ini :

— „Dji-ma! Apatah sasoeda tidoer, maski tjoema satoe kali atawa sabentaran sadja kaoe tida sedar atawa mendoesin denger soeara apa-

apa jang menjoerigaken ?“

— „Sama sekali tida. Semalem akoe rasaken tidoer jang paling enak dan sanget njenjak.“

— „Apa kaoe memang ada saorang jang sangatet dojan tidoer ?“

— „Tida ! Tida saben malem akoe bisa tidoer begitoe njenjak.“

— „Tapi apa semalem kaoe tida dapet denger soeara treakannja kaoe poenja njonja madjikan ?“

— „Tida.“

— „Betoel-betoel kaoe tida denger ? Saoepamanja njonja madjikanmoe benar-benar betreak, apa kiranya kaoe bisa dapet denger ?“

— „Akoe rasa tentoe bisa denger djoega, kerna antara kamarkoe dan kamarnja madjikan tjoema kealingan satoe dinding tembok sadja.“

Sampe di sitoe roepanja Sioe Kin soeda ilang sabar dan laloe menegor sang detective dengan soeara jang mengoendjoek koerang seneng : „Ach ! Toean !! Boekankah tadi pagi kaoe soeda bikin pertanjahan-pertanjahan dengan terang satoe per satoe ; sedeng semoea .kamar djoega kaoe soeda preksa dengan teliti . . . . . sekarang kombali kaoe maoe bikin pertanjahan-pertanjahan lagi jang lebi melilit-lilit. Ada faedanja apa dalem itoe pengoesoetan ?“

„Maäf toeant !“ itoe detective berkata „Maka kaoe kombali madjoeken poela itoe pertanjahan-pertanjahan dengan lebi tjeriwis, sebab akoe perloe ingin dapet taoe lebi banjak doe-

doeknja perkara, agar gampang dibikin penjelidikan ; laen dari pada itoe, sebab sekarang akoe baroe dapt taoe bahoewa pentjoeri soeda masoek sabelonnja njonja roema tidoer jang mana tentoe sekali ia ada taoe, atawa kaloe oepama kata itoe waktoe ia soeda tidoer tentoe sedikitnja mendenger soeara bekreseknja sepatoe dan diroesakinnja peti peti, mengapa tah ia tida maoe bertreak. In i ada ditetepken oleh dji-ma, jang mana ia tida denger sama sekali soeara treakan."

„Dan sekarang kaoe maoe berboeat apa lagi?.....“ Sioe Kin memoetoesken dengan roepa tida sabar.

„Tentoe sekali,“ si detective mendjawab „sekarang akoe maoe menanja kaoe poenja istri.“

„Soeda tjoekoep!“ Sioe Kin berkata dengan soeara sedikit sengit „Akoe harep kaoe djangan melantoer terlaloe djaoe, toean detective ; dari pada kaoe saben-saben boeang tempo dateng kamari boeat menanja ini dan itoe jang tida ada goenanja, boekankah ada lebi baek dengan lekas kedjer si pentjoeri jang tentoe soeda lari djaoe ka laen tempat? Akoe bersoempa, jang moelai dari wates ini djam, akoe tida merasa perloe lagi dengan kaoe poenja perteloengan.....“

Dapet tegoran jang demikian poenja pedes, itoe detective djadi boengkem saoepama lidanja kena dibekoek masoek ka sabela dalem

moeloet; ia doedoek terpekoer dengen moeka mera saking maloenja. Samentara itoe, toean roema berbangkit dari tempatnya doedoek menghamperi sobatkoe Wat Song sambil berkata: „Pada kaoe toean, lebi doeloe akoe mengoe-tjap banjak trima kasi. Akoe harep kaoe poenja papreksahan sekarang soeda rampoeng dan laen hari kitaorang boleh ketemoe kombali boeat beroend'ng lebi djaoe.“

Perkatahan jang dioetjapken itoe, jang tida bisa diartiken laen dari pada ia mengoesir tetamoenja dengen tjara aloes, akoe kira tentoe lantaran toean roema soeda djadi sanget djemoe berhadepan pada itoe detective goblok dan kasar.

Wat Song jang sedari tadi boengkem mendengerin sang detective berkata-kata, sekarang kaliatan bangoen dari tempatnya doedoek dan bitjara bisik-bisik pada Sioe Kin. Roepanja ia ada pesen omongan apa-apa jang laen orang tida boleh mendenger.

Lebi djaoe Wat Song ambil slamet berpisa dan djambret badjoekoe. Kitaorang berdjalan poelang dengen berendeng. Itoe detective poen dengen roepa sanget maloe, sasoeda permisi, sigra ngelojor.....

---

## VI

## PIKIRAN JANG SANGET ROEWET.

Koetika sampe di roema, barang satapan soeda disediaken di atas medja, maka kita orang jang peroetnja memang soeda merasa lapar, lantes doedoek bersantap. Akoe liat Wat Song tida seperti biasanja, makan sembari pasang omong. Ia tinggal boengkem dan lantaran akoe taoe jang ia tentoe lagi berpikiran roewet, maka akoe poen tida maoe menegor sapata kata.

Satelah abis makan ia masoek ka kamar boekoe, dimana akoe poen mengikoeti masoek. Kitaorang doedoek dengen tida berkata-kata seperti biasanja. Akoe laloe poeloeng doeа roko dan angsoerken padanja jang satoe batang. Biasanja Wat Song tida soeka isep roko, tapi kaloe djoestroe pikirannja lagi kaloet atawa roewet memikirken soeatoe hal, ia anggep roko sebagai sobat pembantoenja. Ia menjamboeti dengen l ntes dan kamoedian laloe njalaken geretan api dan satelah disoendoet, ia teroes isep dengen tida rasaken lagi jang tembakonja ada keras.

Sesaät kamoedian ia berbangkit dari tempatnya doedoek, djalan moendar mandir di dalem itoe kamar dengen pelahan dan sembari toen-doeken kapalanja, selakoe orang jang lagi mengoekoer atawa menghitoeng tindakan.

„Ach! . . . Heran, betoel-betoel sanget meng-

heranken, . . . satoe kaki tiga duim? . . . apa boleh djadi? . . . " demikian achir-achir ia menggerendang.

„Ha, sobatkoe!“ mananja akoe sembari mesam „Apa kaoe lagi pikirin itoe perkara pentjoerian?“

— „Jah, akoe lagi rasaken poejeng bekerdja-nja akoe poenja oerat otak.“

— „Memang itoe perkara ada sanget soeker dan soelit. Dan apatah kaoe tida merasa perloe dengen itoe moetiara goena memboeka djalannja penjelidikan?“

— „Akoe rasa itoe barang tida ada hoeboengannja sama ini perkara. Apa kaoe masih mendoega, bahoewa si pentjoeri Kang Lam Yan adanja?“

„Soeda tentoe,“ djawab akoe dengen ter-tjenggang serta kaget „tapi apatah kaoe tida mendoega padanja?“

„Tida!“ ia mendjawab dengen soeara tetap sambil lempar poentoeng rokonja „Sama sekali akoe tida mendoega Kang Lam Yan. Kaloe betoel ini pendjahat jang telah lakoeken itoe pentjoerian, tentoe sekali dengen gampang akoe lantes bisa tjari ia poenja tempat semboeni. Djoes troe lantaran boekan ia, maka soeda membikin akoe merasa soeker boeat lakoeken penjelidikan.“

— „Kaloe kaoe mendoega boekan Kang Lam Yan jang lakoeken itoe pentjoerian, apatah kaoe ada mempoenjai alesan tjoekoep? Tjoba

tjeritakenlah alesan itoe.“

Wat Song laloe doedoek kombali di krosi dan menoetoe demikian : „Pertama, boekankah toelisan jang dilloekisken di teubokan ada dje lek ? Sedeng kaoe tentoe masi inget, bahoea itoe doe pentjoerian jang terdjadi selang satoe boelan, toelisannja ada bagoes, boekan ? Ini ada ditetapken oleh soerat-soerat kabar jang moeat verslagnja. Kadoea, itoe peti-peti jang diroesakin, roepanja dengen goenaken sendjata sanget tadjem ; inilah ada oendjoek jang si pentjoeri belon boleh dikata oeloeng. Kaloe orang menoedoe Kang Lam Yan dengen gegaba, soeng-goe salaennja ia maloe djoega tentoe aken merasa difitena, kerna sabenarnja djoega memang boekan ia. Pada itoe doe pentjoerian jang doeloean, kabarnja ada sanget mengagoemken orang banjak, kerna tjaranja memboeka pintoe dan peti-peti tempat menjimpfen barang berharga, orang sampe tida abis me ngarti, diboeka dengen goenaken perkakas matjem apa. Menoeroet doegahankoe, Kang Lam Yan soeda boeka itoe dengen goenaken koentji resia, hingga maski tjoema sedikit tida tingga'ken bekas.“

„Akoe lebi moefaket dengen doegah-n kaoe,“ kata akoe dengen roepa seperti orang jang baroe tersedar dari kasesatan „tapi apatah kaoe soeda bisa mendoega-doega pentjoerinja?“

— „Tentang itoe, maski akoe sekarang soeda mempoenjai sedikit doega-doegahan, akoe ma-

si belon brani tetapken kabenerannja. Akoe maoe bilang, bahoewa si pentjoeri, maski belon terlaloe oeloeng, toch ada saorang jang tjerdk djoega. Ia sengadja pindjem namanja Kang Lam Yan sakedar boeat selimoetin kasalahannja dan dengen maksoed kedja bodo pada politie."

— „Datengnja si pentjoeri, dari dalem atawa dari loear roemah?“

— „Nah, djoestroe ini satoe soewal jang paling soeker dipetjaken. Menoeroet katanja itoe orang toea pendjaga gredja, selang brapa hari ini ada saorang jang menoerigaken mengintip-intip dan preksa keadahan tempat di blakang roemahnja familie Soen, hingga bisa menerbitken doegahan, jang si bangsat ada orang loear, samentara djika menilik anggepanja pembesar politie, pentjoeri tentoe soeda masoek dengen terbantoe oleh orang dalem roemah, kerna ia tida pertjaia, satoe pentjoeri bisa kenal betoel selak seloeknja roemah jang dikoendjoengin diwaktoe malem, serta djoega kabetoelan sekali Sioe Kin telah kaloear pintoe bersama-sama Ang Hok, kaloe tida dapet bantoeannja orang dari sabela dalem. Ini doegahan djoega rada masoek diakal. Tadi dengen diam-diam akoe ada bikin pertanjahan pada Sioe Kin, apa brangkali sabelonnja ia pergi nonton lebi siang soeda njataken itoe; jang mana ia soeda djawab „tida“. Ia kata lebi djaoe, ia memang ada sanget soeka nonton opera dan se-

malem ia timboel ingetan boeat pergi non-ton sasoedanja abis bersantap malem. Itoe sebab djoega, mana boleh djadi orang loear bisa taoe itoe hal zonder orang dalem roema ber-kongkol dan soeda kasi kabar complotnja boeat barengin masoek kaloe toean roema soeda ka-loear? Berhoeboeng dengen ini, akoe laloe men doega, brangkali pentjoerian terseboet soeda dilakoeken oleh saorang dalem itoe roema djoega, jaitoe sala satoe boedjang. Ia djalan mengider di roema blakang dan bikin roesak itoe pintoe, kamoedian satelah semboeniken barang tjoeriannja laloe mengider dari pintoe loear, balik kombali masoek dalem roema. Tapi . . . . . Hm! kaloe doegahankoe itoe ada tjotjok, soenggoe lebi aneh lagi, sebab waktoe si boedjang pentjoeri masoek pasti liwatin pintoe jang didjaga oleh Louw Eng, jang mana pasti ia ini ada taoe orang liwat di sitoe; toch ternjata ia bilang dengen soenggoe soenggoe tida ada saorang jang djalan liwat di pintoe jang ia djaga. Inilah jang kedja roewetnja doega-doegahankoe . . . . .

— „Apa tida bisa djadi jang si pentjoeri soeda kaloeear masoek dengen ambil djalan dari pintoe blakang sadja?“

— „Kaloe begitoe, djadi kaoe mendoega djoega jang daonnja pintoe blakang telah diboeka dari sabela dalem? Itoe toch ada oendjoek dengan terang, diboeka dengen dorongan dari sabela loear.“

— „Apa kaoe bisa taoe, kaloe oepamanja si pentjoeri roesakin lebi doeloe itoe roema koentji dari sabela dalem, kamoedian lantes diroesakin lagi dari sabela loear ?“

— „Itoelah tida bisa djadi, sobatkoe.“

— „Apa brangkali pengakoeannja Louw Eng ada bohong ?“

— „Boleh djadi begitoe, tapi ini akoe tida brani tetapken.“

— „Tapi, orang dari dalem itoe roema, sia-patah jang kaoe tjoerigaken ?“

— „Jang mana satoe diantara itoe ampat boedjang selaennja Ang Hok, akoe belon bisa bilang dengen pasti Itoe ampat boedjang moesti ditjoerigain, teroetama itoe toekang masak jang lebi menarik akoe poenja perhatian. Samentara pada Louw Eng djoega ada sedikit sangkahan, tjoema sadja djika diliat kealimannja, kedja itoe sangkahan kepaksa akoe tarik kombali. Selaennja ampat boedjang itoe, djoega Ang Hok tida boleh tida moesti diperhatiken, tapi kaloe dibilang ia lakoeken pentjoerian zonder terbantoe oleh laen boedjang, ini djoega tida boleh djadi.“

— „Dan, pada itoe bekas toekang kebon, akoe rasa baek djoega kaoe ambil perhatian.“

— „Betoel ia itoe djoega haroes ditjoerigaken, tapi kaloe oepama benar ia jang lakoeken pentjoerian, moesti disangkoet djoega Louw Eng, kerna ia ini tentoe ada toeroet tjampoer atawa membri bantoean.“

— „Apatah kaoe maoe pertjaia abis, kaloe Louw Eng itoe ada satoe boedjang jang setia?“  
Sobatkoe Wat Song keroetin djidatnja dan toendoeken kapala.

„Kaloe meliat ia poenja tampang moeka,“ demikian kombali Wat Song berkata „memang ada seperti saorang jang bisa dipertjaia kase-tiahannja. Tapi akoe masih sangsi dan koeatir, djika mendoega dengan meliat koelit, nanti kasalahan meraba, maka djoega kaoe boleh anggep sadja jang doegahankoe itoe tjoema tida lebi dari doegahan kosong sadja.“

„Abis?“ akoe menanja lebi djaoe „Kaoe maoe ambil tindakan tjara bagimana?“

— „Boeat bisa dapetken djalan atawa sedikit kapastian, akoe maoe menanja lebi doeloe pada boedjang boedjang dalem itoe roema. Tapi soenggoe sajang sekali, jang Sioe Kin roepanja djadi koerang senang hati kaloe orang menanjaken pada ia poenja boedjang-boedjang itoe. Kaoe toch liat sendiri waktoe ia menegor dengan perkatahan sengit serta pedes pada itoe detective dari gouvernement?“

— „Jah, itoe toch ada satoe permintanan jang patoet dikaboelken, boekan?“

— „Betoel bahoewa itoe ada satoe permintahan jang pantes dari satoe detective. Tjoe: malah dari sebab tjoepetnja Sioe Kin poenja pikiran, maka soeda djadi rada goesar tatkala itoe detective gouvernement maoe menanja istrinja jang kadoea. Boekan tjoema itoe sadja

jang membikin akoe djadi koerang laloeasa la-koeken pengoesoetan, tapi djoega Ang Hok ada mendjadi rintangan.“

— „Hei! Apatah sebabnya?“

— „Kaoe tadi tentoe denger dan sekarang pasti masih inget, jang ia telah seboet dirikoe, satoe detective jang tjerdk dan pande, boekan? Itoe seboetan terang sekali ia maksoedken boeat menjindir! Boleh djadi lantaran ia mengandel dengen kapandean serta katjerdikannja diri sendiri jang dipoedji-poedji oleh ia poenja madjikan, maka ia maoe selidikin sendiri itoe perkara pentjoerian sampe mendapat hasil jang di'inginken. Itoe sebab djoega, ia soeda djadi mengiri dan membentji tatkala dapet liat akoe berada di roema madjikannja. Apatah ini boe-boekan a a satoe rintangan djoega dalem akoe poenja penjelidikan?“

— „Sekalipoen ada banjak rintangan, kaoe haroes madjoe teroes dan djangan telantarken pakerdahan jang orang pertjaiaken padamoe. Kaoe sendiri toch seringkali tjerita, bahoewa Sherlock Holmes poenja nama djadi terkenal di segala ploksok, lantaran kabraniannja melawan ia poenja moesoe-moesoe dan terdjang dengen taba semoea rintangan-rintangan. Akoe pertaja dan harep, kaoe nanti toelad ia poenja segala apa.“

„Ha, ha, ha!“ Sobatkoe!“ Wat Song tertawa berkakakan dan kamoedian laloe bangoen berdiri ..Apatah betoel-betoel kaoe maoe anggep

akoe ini ada Sherlock Holmes dari Timoer? Tapi toch akoe belon perna dapet denger, selagi handepin perkara-perkara jang roewet, Sherlock Holmes moesti diboedjoek-boedjoek oleh ia poenja sobat Watson. Ha, soenggoe akoe haroes merasa maloe pada kaoe, Watson-koe jang pinter."

Abis berkata demikian, ia laloe berdjalan wara wiri poela, matanja memandeng ka bawa sambil moeloetnja berkemak-kemik. Akoe tida mengarti, apa maksoednja ia berboeat begitoe roepa.

„Wat Song!“ akoe menegor „Mengapa kaoe moendar-mändir sambil berkemak-kemik tjara begitoe?“

„Jah, akoe lagi pikirin itoe telapakan kaki,“ saoetnja ia dengen adem.

„Ha! telapakan kaki?.....“

„Betoel!“ ia bikin poetoes akoe poenja omo ngan. Dan tjobalah kaoe dengerken itoe. Siapa jang memboeka pintoe, Apa brangkali Soen Kek In?“

Dengen sigra akoe bangoen dari krosi madjoe mendengerin. Bener sadja di loewar ada orang jang lagi bitjara. Akoe lantas kaloeear, dimana akoe dapet liat Kek In lagi bitjara sama boedjangkoe; ia poenja moeka sanget poetjat, badannja goemeteran. Ia poenja sabela tangan ada pegangin satoe soerat,

## VII

## SATOE ANTJEMAN.

A koe tida bisa doega, dengen maksoed apa Kek In koendjoengin lagi roema kita dan diwaktoe gelap goelita. Akoe laloe djambret tangannja dan pimpin ia masoek ka dalem ka mar. Napasnja masih sadja tersengal-sengal ; ia laloe angsoerken soerat itoe pada sobatkoe Wat Song.

„Oh, toean Wat !“ demikian satelah mengaso sabentaran ia laloe moelai berkata „Orang sadalem roemakoe soeda djadi sanget katakoetan boekan maen, teroetama ajahkoe, lantaran manerima itoe soerat antjeman. Politie jang diber- taoeken sigra siapken pendjagahan di depan dan blakang roemakoe, sedeng ajahkoe soeroe akoe dengen salekas-lekasnya bawa soerat itoe boeat diseraken pada kaoe.“

„Siapatah jang mengirimken soerat ini ?“ dengan roepa heran Wat Song menanja pada Kek In.

„Ada diboeboein tanda tangannja Kang Lam Yan.“ Kek In lantes mendjawab dengen soeara goegoep „Tjobalah kaoe batja isihnjia soerat itoe, perhatiken tanda tangannja. Kaoe nanti tentoe aken bilang, bahoewa itoe persiapan pendjagahan politie ada dengen sapantesnja.“

Akoe pikir jang ini ada soeatoe kadjadian diloe ar doegahan. Tadi Wat Song ada begitoe pertjaja dengen doega-doegahannja sendiri, jang

si pendjahat boekan Kang Lam Yan. Tapi sekarang ternjata ia poenja doegahan soeda meleset djaoe sekali. . . . .

Wat Song lantas kaloearken soerat itoe dari envelopnja dan kamoedian batja dengen soeara kalm.

„Inilah soenggoe ada diloeär doegahan!“ achirnja ia berseroeh „Siapatah jang soeda boeka lebi doeloe soerat ini. Apa politie?“

— „Boekan! Ajahkoe jang soeda boeka dan batja lebi doeloe. Jang anterken soerat itoe ada post-looper, jaitoe selang lima menit kaoe berlaloe dari roemakoe.“

— „Djadi, kaloe begitoe politie belon dapat batja soerat ini?“

— „Soeda, kerna sasoedanja ajahkoe batja abis isihnya, baroelah dengen roepa sanget koeatir dan takoet, boeroe-boeroe soeroe orang bawa ka kantoor politie seraja minta djoega soepaia sigra disiapken pendjagahan. Tadinja politie maoe simpenken ini soerat, tapi ajahkoe kaberatan, sebab perloe maoe dikasi oendjoek pada kaoe, brangkali ada faedanja.“

Wat Song keroetken djidatnja. Selagi ia maoe batja lagi sekali soerat itoe, mendadak Kek In telah berkata poela demikian: „Maäf toean Wat dan djoega kaoe sobatkoe Pauw Long; lantaran di roema ajahkoe lagi menoenggoe dengen hati koeatir maka akoe perloe lekas-lekas djalan poelang. Dan ada lagi satoe perkatahan jang akoe rasa perloe moesti disampeken pada kaoe

toean Wat. Waktoe kaoe minta keterangan akoe soeda kaloepahan seboet, jang Louw Eng ada bilang, tadi malem ada dateng di depan roemakoe, satoe toekang djoli bernama Tang Sam.“

Wat Song angkat moeka dan kombali ke-roetken poela djiidatnja ; ia poenja mata kaliaitan sedikit beringas, seperti djoega ia dapet tangkep soeatoe apa dengen keterangan, jang baroesan dibriken itoe.

„Ada kaperløean aga,“ ia laloe meneges lebi djaoe „malem-malem si toekang djoli dateng di depan roema kaoe ? Tioba terangkenlah djam brapa ia soeda dateng ?“

— „Louw Eng bilang, Tang Sam soeda dateng dengen bawa djolinja, sebab ia denger jang ajahkoe maoe pergi nonton, tapi koetika ajahkoe kata maoe berdjalan kaki bersama-sama Ang Hok, ia poen sigra berlaloe dengen tangan kosong. Tatkala itoe kira kira baroe poekoe toedjoe.“

— „Apa memang biasanja Tang Sam djalan kaloear masoek dalem kaoe poenja roema ?“

— „Jah, lantaran kaloe bepergian, ajah atawa iboekoe seringkali doedoek ia poenja djoli.“

— „Ia ada tinggal beroema di mana ?“

— „Di Sip-sin-kee, roema nomer 73 ; terpisa tida sabrappa djaoe dari roemakoe.“

— „Siapatah ia poenja kawan, kaloe ia memikoel itoe djoli ?“

— „Ia poenja ade sendiri bernama Tang Soe.

Iaorang poenja penghidoepan sahari hari memang tjoema menjender pada itoe pakerdjahan.“

— „Apatah kaoe bisa petaken roepanja itoe doeaa soedara ?“

— „Tang Sam ada saorang jang berbadan tinggi besar, sedeng ia poenja ade, Tang Soe, maski tida boleh dikataken berpengawakan ketjil, tapi masi kala gemoeknja dengen ia poenja engko. Apatah maksoednja kaoe menanja sampe di sitoe ?“

— Satoe detective memang perloe djoega sama segala keterangan jang maski kaliatannja tida begitoe penting. Akoe poenja pertanjahan tjoekoep sampe di sini sadja. Akoe minta kaoe soeka doedoek doeloe sabentar, akoe maoe preksa lagi boeninja itoe soerat.“

— „Trima kasi toean ; akoe tida bisa doedoek lebi lama di sini. kerna seringkali ajahkoe perloe dengen akoe. Tadi, lantaran ajahkoe merasa djemoe meliat laga lagoenja itoe detective, maka soeda bikin terlantar kaoe poenja koendjoengan. Akoe minta kaoe membri maaf dan tida ketjil hati serta tida mendjadi bosen aken besok pagi koendjoengin poela roemakoe.“

— „Baek, besok pagi akoe koendjoengin lagi roema kaoe. Toeloeng sampeken djoega pada ajahmoe, djangan terlaloe pikirken ini perkara sampe meliwatken wates.“

Sambil mengoetjap „trima kasi,“ dan manggoetken kapalanja, Kek In lantes berdjalanan poelang. Akoe anterken ia sampe di loear pin-

toe, kamoedian akoe balik kombali ka kamar.

Pikirankoe mendadak djadi sanget roewet, lantaran inget perkatahannja sobatkoe Wat Song tadi, jang bi'ang, bahoewa Sioe Kin poenja niat pergi nonton opera telah timboel dengen mendadak. Ini sebab djoega jang soeda mem-bikin sobatkoe djadi tjoeriga sama boedjang-boedjang dalem itoe roema. Tapi, kaloe akoe pikir lebi djaoe lagi, boekan tjoema orang-orang di dalem roema sadja jang taoe itoe niat-an boeat pergi nonton, kerna baroesan Kek In bilang, Tang Sam djoega taoe itoe, maka telah tawarken djolinja. Lantaran demikian, apatah kita moesti tjoeriga meloeloe terhadep orang-orang sadalem roema sadja.

Sakoenjoeng-koenjoeng akoe djadi inget, jang Kek In telah seraken satoe soerat pada sobatkoe, maka akoe laloe menghamperi ia dengen tindakan tjebet.

„Ha, sobatkoe!“ akoe menegor „bagimana boeninja soerat itoe?“

„Akoe doega,“ Wat Song mengoetaraken pendapetannja „itoe orang jang menoelis ini soerat, tentoe ada paham membatja boekoe tjerita Soei-houw atawa Song-kang.“

Akoe toeroet batja soerat terseboet jang ada begitoe ringkes, sedeng toelisannja ada sanget djelek. Boeninja ada seperti brikoet di bawa ini:

\* \* \*

Kaloe kaoe masi sadja maöe mengoeber dan tjari padakoe boeat bisa dapetken komban-

li kaoe poenja milik jang akoe soeda tjoeri,  
awas! akoe poenja golok jang terkenal tadjem  
dan galak, tida nanti ampoenin kaoe poenja  
djiwa.

Kang Lam Yan.

Satelah akoe batja abis, sobatkoe Wat Song  
telah berkata: „Diliat dari boeninja ini soerat  
jang ada mirip seperti soerat-soerat antjeman-  
nya kawanan penjamoen di Liang-san, membi-  
kin akoe djadi mendoega penoelisnya ada paham  
membatja tjerita Soei-houw. Apatah kaoe djoeg-  
ga ada berpendapatan begitoe, sobatkoe Pauw  
Long?“

„Tapi akoe rasa, kaoe moesti perhatiken  
toelisan itoe dengen teliti.“ Akoe berkata.

— „Jah, dan sekarang akoe soeda preksa de-  
ngan betoel serta pahamken satoe per satoenja.“

— „Soekoorlah, dan apatah sekarang kaoe  
masi djoega belon mendoega pada itoe bang-  
sat jang terkenal, Kang Lam Yan?“

— „Betoel atawa tidanja soerat ini ada di-  
toelis oleh Kang Lam Yan, kitaorang tida oesa  
retjokin; tapi tjobalah kaoe perhatiken; ini soe-  
rat ada sama atawa mirip dengen itoe toelisan  
di atas tembok atawa tida?“

— „Kaoe pertjaia jang soerat ini dan itoe  
toelisan di tembok ada ditoelis oleh satoe tangan?“

— „Jah, betoel akoe ada anggep begitoe, ker-  
na di sini ada doea boekti jang mengoendjoek:  
Pertama, soerat ini ada ditoelis dengen goena-  
ken aboenja areng, sedeng jang ditoelis di atas

tembok djoega soeda ditoelis dengen itoe matjem barang djoega. Kadoea, sabagimana kaoe sendiri taoe, toelisan jang di tembok ada sangat djelek, sedeng ini toelisan poen ada boeroek. Maskipoen doedoeknja hoeroef orang soeda bikin-bikin soepaia beda djaoe sama jang ada di atas tembok, tapi toch akoe poenja mata tida gampang diklaboein. Akoe brani pastiken, bahowa antara ini dan itoe ada ditoelis oleh satoe tangan."

— „Kaloe begitoe djadi kaoe doega dengen pasti, soeda ditoelis oleh saorang tapi orang itoe boekan Kang Lam Yan adanja?"

Sembari mesam simpoel sobatkoe itoe telah manggoetken kapalanja.

„Apatah kaoe nanti bisa goenaken ini toelisan," akoe meneges „boeat sendjata dalem pengoesoetan?"

„Apa brangkali kaoe kira," djawabnja Wat Song „dengan tjotjokken toelisan ini pada orang jang disangka poenja toelisan, lantes dengan gampang kita bisa bekoek pentjoerinja? Inilah tida bisa djadi, sobatkoe kerna salaen toelisan dalem ini soerat sengadja dibikin tida menoeroet betoel dari djalannja tangan jang soewadjarnja, djoega boeat bisa dapetken toelisannja orang jang disangka, boekan ada satoe pakerdjahan gampang."

— „Menoeroet doegahanmoe, dengan maksoed apa, maka sipentjoeri soeda mengirimken ini soerat?"

— „Tentoe, tida laen tjoema sebiji gertakan  
meloeloe.“

— „Kaloe begitoe, djadinja soerat ini tida  
aken menoeloeng banjak dalem penjelidikan  
jang kaoe bakal lakoeken?“

— „Boekan begitoe. Akoe tida bilang jang  
soerat ini tida menoeloeng soeatoe apa dalem  
penjelidikan jang akoe bakal lakoeken. Boleh  
djadi jang soerat ini ada pengoendjoek djalan jang  
pertama dalem itoe penjelidikan, d'oega akoe  
belon bisa bilang dengen pasti. Sekarang akoe  
belon bisa oetaraken lebi djaoe pada kaoe.“

— „Tapi, apatah kaoe djoega tida bisa oeta-  
raken doegahan dengen kira-kira sadja?“

Wat Song tida lantes membri penjaoetan,  
hanja laloet taro envelope dari soerat terseboet,  
di atas paha sendiri. Ia mengawasi itoe dengen  
perhatian.

„Kaloe kaoe ingin djoega taoe akoe poenja  
pengoetaranan,“ achir-achir ia berkata „baek-  
lah, sekarang akoe petjaken, dari mana da-  
tengnya soerat ini;“

Ini soerat ada kalambatan sampenja. Di  
moeka ini envelope ada ditoelis sabelas hoeroef.  
Di bagian kanan tertelis tempat tinggal, di  
bagian tengah namanja si penerima dan di ba-  
gian kiri nama afzndernja si pengirim. Dengan  
perhatiken beanja, jaitoe tjoema ditempel  
postzegel harga satoe cent, tentoe soerat ini  
toelah dikirimken dari dalem ini kota djoega.  
Jang kedja lambat sampenja soerat ini, jalah kerna

kena tersasar-sasar lebi doeloe. Liatlah poststempel dari tiga Postkantoor; jaitoe A. B. dan C. Poststempel jang pertama, jaitoe jang kena betoel pada postzegeleinja, ada dari Postkantoor A. 7 - 25 Mei djam 10 pagi. Ini ada oendjoek soerat dari dalem ini kota djoega. Toch menoeroet katanja Kek In, soerat ini sampe satelah kitaorang berlaloe dari ia poenja roema. Mengapa bisa kadjadian itoe kalambatan; inilah kita koedoe tjari taoe adanya Postkantoor dalem ini kota. Postkantoor di Sip-sin-kee ada doe, jaitoe B. dan C., samentara roemanja Soen Sioe Kin ada ma-soek dalem bilangan Postkantoor C. Tatkala Postkantoor A bagi soerat soerat, soeda kasa-lahan kirim ka Postkantoor B. jang laloe tjari nama adresnja serta ternjata tida dikenal, maka laloe diretour kombali ka Postkantoor A. Postkantoor A preksa lagi dan kamoedian te-roes kirim ka Postkantoor C."

Akoe merasa tida sabaran boeat mendenger-in itoe peroendingan jang akoe pandeng tida ada kapentingannja sama sekali, maka akoe laloe bikin poe-toes itoe sambil menanja: „Kaoe ada sanget perhatiken itoe envelop poenja tjap-tjap dari Post; apa kaoe kira ini ada faeda-nja bagi penjelidikan?“

„Ach!“ Wat Song menjaoet dengen roepa koerang senang „Masatah kaloe tida ada fae-danja akoe moesti ambil perhatian begitoe roe-pa. Dengan meliat poststempelnja toch akoe

djadi dapet taoe, di mana si bangsat ada tinggal."

— „Dan . . . . laen-laennja apa lagi?“

— „Soeda tjoekoep! Akoe rasa tida perloe akoe menoetoer lebi djaoe lagi.“

Ia lantas lipet kombali soerat itoe dan ma-soeken dalem envelope jang laloe dimasoeken ka dalem notesnya.

„Pauw Long!“ kamoedian ia berkata „Lantaran besok pagi akoe moesti bekerdja keras dalem itoe pengesoetan, jang bisa djadi djoega perloe dengen kaoe poenja bantoean, maka ada lebi baek jang ini malem kitaorang tidoer siang-siang. Nah! Slamet tidoer, sobatkoe.“

Setelah oetjapken perkatahan terseboet dan gapeken tangannja, ia lantes berlaloe menoedjoe ka kamar tidoer. Sesaät kamoedian kadengeran ia soeda mengeros-ngeros.

(Ada samboengannja).



LOTERY

# OEWANG BESAR

---

INDISCH BRONBEEK  
SEKARANG

# SOEDA KLOEAR

DAN

# AMPIR ABIS

HOOFDPRYS 150,000.—

(Ditamba lebi banjak prys ketjilan)

Harga per lot f 11.

Rembours tamba f 0,75

Franco „ f 0,35

Trekkinglist gratis.

Pembatja jang ingin beli, baik lantas  
atoer pesenan sekarang, laat sedikit,  
tentoe keabisan.

Menoenggoe pesenan :  
TAN'S DRUKKERY  
Soerabaja.